

Ekwo Nehemaya

¹ O'waa bu opfu Nehemaya nwa Hakalaya.

Nehemaya vutaru ivu ẹhu Jierúsalemu

L'onwa Kisilewu l'apha k'ukporo ẹẹ mu nọ lẹ Susa, bu ishi mkpukpu; ² bẹ Hanani, bu onye lanu l'ime unwune mu yele unwoke ozo tukoru shi l'alị Jiu bya. Mu jia phe aji ndu Jiuda, phoduru nu; mbu ndu ono, shi l'alị, e shi kpuru phe lẹ ndzu laa; laphu azu ono. Mu bya ajikwaa phe pho aji Jierúsalemu. ³ Ẹphe su mu lẹ-a: "Ndu ono, e shi kpua lẹ ndzu laa alị ozo; ẹphe mechaa laphu azu l'alị ndu Jiuda ono bẹ onodu phe dukwa eji shii; mbu l'onodu phe bẹ iphere iya dukwa. Igbulo Jierúsalemu bẹ e nwukposhichaaruru enwukposhi; teme onu-abata iya bẹ oku tsukotaru."

⁴ Mu numachaa iphe ono, ẹphe pfuru ono; mu nọ-zeta anọ wata ara ẹkwa.

Mu nọ ujiku olemole gukota aphu; aswi ẹgu epfu anu Chileke k'imigwe. ⁵ Iphe, mu pfuru bu: "Gube Chipfu, bu Chileke k'imigwe; mbu Chileke ono, paru ẹka bya adu ebvu ono; onye ono, edobeje ogbandzu iya l'ẹhu ndu yeru iya obu bya eme iphe, o pfuru; teme o nodu egoshije phe lẹ ya yeru phe obu. ⁶ Ngabenu nchi; le mu ẹnya; numa epfupfu, mube onye-ozu ngu epfu anu ngu; mbu epfupfu, mu anoduje l'iphu

ngu epfu anụ ngu eswe l'enyashi l'iswi ẹhu ndu-
 ozi ngu, bụ ndu Ízurelu. Mu epfufuta iphe-ẹji,
 anyibe ndu Ízurelu megbaberu ngu; mbụ iphe-
 ẹji, mbedua mę ndibe nna mu phez meru ngu.
⁷ Anyi mewaru ngu ẹjo-iphe, ha shii; mbụ l'anyi
 pawaru eme ekemu ono, ị tųru ono haa; bya
 ahaa eme iphe, ị tųru ọkpa iya sụ g'e meje; mę
 eme omelali, i doberu, bụ iya bụ iphe, ị tųru
 l'ekemu nụ onye-ozi ngu, bụ Mosisu. ⁸ Nyatanụ
 opfu ono, i pfuru onye-ozi ngu, bụ Mosisu sụ:
 'Ọ -bųru l'e te egudedu ire unu ẹka bę mu a-
 tųkashikwa unu nanụ nanụ l'echilabọ ohamoha.
⁹ Ole ọ -bųru l'unu dakoberu lwapfuta mu; bya
 edobe ekemu mu; eme iya ememe; o betakpọ
 ẹka a chiru unu laa bųru l'ọhu ẹka igwe beru
 alị beru; bę mu e-shi l'ẹka ono rwukọbe unu;
 duphuta unu azụ l'ẹka ono, mu hotaru g'ọ bųru
 ẹka mu e-buru eburu ono.'

¹⁰ "Ọo ndu-ozi ngu bę ẹphe bụ; bya aburu
 ndibe ngu; mbụ ndu i gude eze ike ngu; mę
 ọkpehu ngu gbafuta. ¹¹ Gube Nnajiuphu;
 ngabenu nchị l'epfupfu, onye-ozi ngu epfu anụ
 ngu; mę l'epfupfu, ndu-ozi ngu epfu anụkwa
 ngu phọ; mbụ ndu ono, bụ ndu ọduje ree
 g'ẹphe tsụ ngu ebvu ono. Jiko menaa g'iphe jeeru
 mube onye-ozi ngu lę ree ntanụ-a; mbụ g'i mee
 g'imemini mu dų nwoke-a, bụ eze."

Teke ono bę bụ mu shi bųru onye agbajeru eze
 męe.

2

Aaha Nehemaya g'o je Jierúsalemu

¹ O be l'õnwa Nisanu l'apha, kwe Atakuza-kuzesu ukporo apha, o wataru aburu eze; g'a pataru iya mee; mu pata mee ono; gbaa-haaruu eze. Ophu o toko du-swee teke mu gbanwubejeru iphu l'iphu eze. ² Eze jia mu su: “?Bu gunu meru iphe iidzu iphu l'ebe abu iphememe eme ngu? O to nweudu iphe ozo gbahaa l'obu ta atsodu ngu utso.”

Teke ono; ndzu wata mu agushi ike. ³ Mu bya asu eze: “Ge gube eze nodukwa ndzu jasuru asuru. ?Bu ke gunu be mu ta anodudu adzu iphu; le mube onye mkpukpu mu dakposhihuru adakposhihu; mbu aka ono, e liru nna mu oche phe; teme oguzo iya buru iphe, oku tsuketaru?” ⁴ Tobudu iya bu; eze su mu: “?Bu gunu be o du ngu ge mu meeru ngu?”

Mu bya atakpeeru Chileke k'imigwe opfu; ⁵ bya asu eze: “O -buru l'o du gube eze ree; mbu o -buru le mube nwozi ngu du ngu l'obu; hanaa mu ge mu jeshia ali Jiuda; je le mkpukpu ono, e liru nna mu oche phe ono; je akpukwaa ya.”

⁶ Eze yele eze-nwanyi, bu onye no-kube iya nu jia mu su: “?Denu g'ii-no-beru l'ije ngu obu? ? Bu teke ole be ii-lwa?” O du eze ree ge mu je; mu bya ataru iya onu.

⁷ Mu pfukwaarupho eze su iya: “O -buru l'o du gube eze ree; denuru ekwo-ozu nu mu ge mu nu ndu bu ochi-oha l'azu enyimu; k'ophu ephe a-ha mu ge mu ghata jeshia ali ndu Jiuda. ⁸ Dekwaapho ekwo-ozu ophu mu a-nu Asafu, bu onye eleta oswa eze enya; g'o nu mu oshi, mu e-gude mee mgbo onu-abata ulo-mgbobuta eze-ulo Chileke; me oshi, mu e-gude mezia igbulu

mkpukpu ono; me ophu mu e-gude mee ulo, mu e-buru.” Iphemiphe, mu rworu eze be o mekotaru mu; kele eka-oma ke Chileke mu be du mu l'ehu.

Nehemaya agbaphe igbulọ Jierúsalemu

⁹ Mu bya ejerwua azu enyimu; mu bya eworu ekwo-ozu ono, eze deru ono nu ndu ochi-oha ono. Eze be duwaru ndu-ishi ndu ojogu; waa ndu agba l'inya yeru mu ge mu l'ephe swiru.

¹⁰ Teke Sambalatu, bu onye Horonu; me Tobaya, bu onye-ishi l'ali Amonu numaerupho l'o nweru onye byaru achọ g'ee-shi g'iphe duru ndu Izurelu le ree; o du phe eji dushia phe iya ike.

¹¹ Noo ya; mu bya abata le Jierúsalemu; noo ya abali eto. ¹² O be l'enyashi ujiku lanu; mu gbalihu; mu l'unwoke olemole; anyi tugbua. Ophu o dudu onye mu pfuwaru iphe, Chileke mu yeru mu l'obu ge mu meeru Jierúsalemu. Ophu o dukwapho anu-agbagba ozo, mu gude ghahaepho ophu mu l'agba. ¹³ O buru l'echi abali be mu gude tugbua. Eka mu shiru bu Onu-abata Nsuda lufuta le Welu Nkuta-oswa; shia ono futa le Onu-abata Ikpozu; ejekpopho agbaphe igbulọ Jierúsalemu ono, e tsukposhiru etsukposhi ono; yele oguzo iya ono, oku tsukotaru ono.

¹⁴ Mu bya eshi l'eka ono tugbua shia uzo Onu-abata Enya-nwobvu; waa Okpuru Eze; ole anu, mu agba agbagba te nwedu eka oo-shi ghata.

¹⁵ Tobudu iya bu; mu gude enyashi ono tugbua kwaseru uzo nsuda; agbaphe igbulọ ono. Mu gbaphechaa ya; bya alwaphuta azu shia Onu-abata Nsuda bahu l'ime mkpukpu.

16 Ophu ndu-ishi amadu ẹka mu jeru; ọzoo iphe, mu meru; kele o toko dudu iphe, mu pfiwaru ndu Jiu; me ndu-uke Chileke; me ndu a maru epha phe; me ndu-ishi; mewaro ndu ozo, bu ndu e-mechaa eje ozi ono.

Nehemaya epfu le ya a-kpukwa igbulo Jierusalemu

17 Tobudu iya bu; mu su phe: “Unu humawaru egube iphe-otsulehu, anyi no l’ime iya; mbu ge Jierusalemu gude dakposhihu; oku tsukota oguzo iya. Unu byakwa g’anyi kpukwaa igbulo Jierusalemu; k’ophu anyi e-mefu onwanyi iphe-iphere l’ehu.” 18 Mu bya epfukwaaru phe pho g’eka-oma ke Chileke mu gude du-be mu l’ehu; waa k’iphe, eze pfokotaru mu. Ephe su: “Ngwa; g’anyi wata iya akpukpu.” Ephe kwakobeahaa eka k’awata eguru ozi ono.

19 Sambalatu, bu onye Horonu; yele Tobaya, bu onye-ishi l’ali Amonu; me Geshemu, bu onye Arabu numaepto iphe ono, anyi chiru idzu iya k’ememe ono; ephe chiahaa anyi ochi jaahaa anyi ewenu asuje: “?Bu gunu be unu eme nno? ?Bu ike be unu ekwefuru eze too?”

20 Mu bya eyeeru phe onu su phe: “O kwa Chileke k’imigwe be e-me g’anyi mee iphe, anyi eme mekota. Anyibe ndu-ozi iya abya awata akpu igbulo obu; ole unubedu te nwe du oke le Jierusalemu; ophu eka unu adudu iya; ophu ndiche unu ebujeduru iya.”

3

Aakpukwa igbulo Jierusalemu

¹ No iya; Eliyashibu, bu onye-ishi uke Chileke; yele ndu ozo, bu ndu-uke Chileke bya agbeshi je atuko kpukwaa Onu-abata Aturu. Epe kpuchaa ya; bya eyeshia ya mgbo. Epe kpuru igbulọ iya o futa l'ulo-ephekerephe "Ukporoise" me le Ulo-ephekerephe "Hananelu." Epe mechaa ya bya eworu iya ye Chileke l'eka.

² Eka ophu etsota eka ono be bu unwoke mkpukpu Jieriko be kpuru iya nu.

Zaku nwa Imuri kpu tsota phe.

³ Unwu Hasena bu phe kpuru Onu-abata Ema. Epe gbaru iya oshi l'eli iya; yeshia ya mgbo; me iphe, eegudeje aswo-chi iya aswo-chi; me mgborigwe.

⁴ Onye kpu-tsotaru phe nu bu Meremotu nwa Uraya, mbu nwanwa Hakozu.

Meshulamu nwa Berekaya, bu nwanwa Meshezabelu kpuru tsota Meremotu.

Zadoku nwa Bana kpu-tsota Meshulamu.

⁵ Ndu mkpukpu Tekowa kpuru eka etsota iya nu. Ole ndu ophu a maru epha phe le mkpukpu ono te ekwedu wozeta onwophe ali jee ozi, ndu-ishi-ozu ono suru g'ephe jee.

⁶ Jioyada nwa Paseya; me Meshulamu nwa Besodeya be kpukwaru Akahu Onu-abata. Epe gbaru iya oshi l'eli iya; yeshia ya mgbo; me iphe, e gude aswo-chi iya aswo-chi; me mgborigwe.

⁷ Ndu kpukwaru eka etsota iya nu bu Melataya, bu onye Gibiyonu; me Jiadonu, bu onye Meronotu; me unwoke Gibiyonu yele Mizupa. Eka ono bukota eka ndu ochi-oha azu enyimu bu ishi.

⁸ Onye kpukwaru ẹka etsota iya nū bụ Uzẹlu nwa Hahaya. Uzẹlu yị lẹ ndu akpuje ụzu mkpọla-ododo.

Onye kpuru tsota iya nū buru Hananaya. Hananaya bẹ yị lẹ ndu emeje manụ-mbeleke, eshi mkpọ. Ẹphe kpuru igbulọ Jierúsalemu ono jasụ lẹ Igbulọ-ọsa.

⁹ Refaya nwa Huru bẹ kpụ-tsotaru phẹ nū. Refaya bụ onye-ishi nkeru-ẹbo uswekete Jierúsalemu.

¹⁰ Onye kpụ-tsotaru phẹ nū bụ Jiedaya nwa Harumafu. Ẹka ọ kpukwaru bẹ bụ nhamunha ataphu ibe iya.

Hatushi nwa Hashabuneya kpukwaa ẹka tsotaru iya nū.

¹¹ Malukayijia nwa Harimu; mẹ Hashubu nwa Pahatu-Mówabu bẹ kpukwaru ẹka igbulọ ibiya ọzo; bya akpua ụlo-ephekerephe, “Ọtapfupfupfu-ọku.”

¹² Onye kpukwaru ẹka tsotaru iya nū bụ Shalumu nwa Haloheshi. Ọ bụ onye-ishi, nkeru-ẹbo uswekete Jierúsalemu. Ọ buru yẹe unwada iya tukuru kpua ya.

¹³ Hanunu yẹle ndu bu lẹ mkpukpu Zanowa bẹ kpukwaru Ọnu-abata Nsuda. Ẹphe kpuru iya bya eyeshikọta iya mgbo; mẹ iphe, egudeje aswo-chi iya aswo-chi; mẹ mgborígwè; bya akpua igbulọ ono ẹka dụ unu nkwo-ẹka labọ l'ukporo nkwo-ẹka iri; kpua ya jeye lẹ Ọnu-abata Ikpọzu.

¹⁴ Onye kpuru Ọnu-abata Ikpọzu bụ Malukayijia nwa Rekabu, bụ onye-ishi uswekete Bẹtu-Hakeremu; ọ kpuru iya yeshikọta iya

mgbo; mę iphe, e gude aswo-chi iya aswo-chi; mę mgborıgwè.

¹⁵ Shalumu nwa Kolu-Hoze, bu onye-ishi ndu bu l'uswekete Mizupa be bu iya kpukwaru Onu-abata Enya-nwobvu. O kpuru iya bya ekpua ya iphe l'eli; yeshia ya mgbo; mę iphe, e gude aswo-chi iya aswo-chi; mę mgborıgwè. O kpukwakwarupho igbulọ Okpuru Shela, no le mgboru mgbabu eze; kpua ya futa l'eka eeshije le mkpukpu Dévidi agbazeta.

¹⁶ Onye kpu-tsotaru iya nu bu Nehemaya nwa Azubuku; onye bu onye-ishi, nkeru-ębo uswekete Betu-Zuru. O kpuru nkiya je akpaa l'iphu ilu Dévidi; kpua ya o futa l'okpuru ono, e gude ęka tya ono; wafua l'eka ndu ojoju bu.

¹⁷ Ndu kpu-tsotaru iya nu bu ndu Lıvayi. Epe no l'eka Rehumu nwa Bani kpua ya.

Onye kpuru tsota iya bu Hashabaya, bu onye-ishi, nkeru-ębo uswekete Keyila.

¹⁸ Eka tsotaru iya nu be bu onye kpukwaru iya nu bu Bavayi nwa Henadadu, bu onye-ishi nkeru-ębo uswekete Keyila lanu ophuu; yele unwunna iya.

¹⁹ Onye kpuru tsota iya bu Eza nwa Jieshuwa. O kpukwaru ibiya ophu du l'iphu ęka eeshije enyiba l'ulo, eedobeje ngwoju; mbu le nkulahu nggoji igbulọ ono. Eza l'onwiya be bu onye-ishi, ndu Mizupa.

²⁰ Eka tsotaru iya nu be bu Baruku nwa Zabayi be gude g'ophu iya l'ehu kpukwaa ya. O shi le nkuku igbulọ ono kpua ya jeye l'onu-oguzo ibe Eliyashibu, bu onye-ishi uke Chileke.

21 Meremotu nwa Uráya; mbụ nwanwa Hakožu bẹ kpuru tsota Zabayi. O shi l'ọnu-oguzo ibe Ẹliyashibu kpua ya jeye l'ẹka ibe Ẹliyashibu jeberu.

22 Ndu ozo, kpụ-tsotaru iya nụ bu ndu-uke Chileke. Ẹphebedua shigbaa lẹ mkpukpu, nọ-pheru Jierúsalemu mgburugburu.

23 Ndu kpukwaru tsota phẹ bẹ bu Benjaminu waa Hashubu. Ẹka ẹphe kpukwaru bu atatiphu ibe phẹ.

Onye kpuru tsota phẹ bẹ bu Azaríya nwa Maseya; mbụ nwanwa Ananaya. Yẹbedua kpukwaru ẹka nọ lẹ mgboru ibe phẹ.

24 Onye kpukwaru ibe iya ozo, tsotaru iya nụ bẹ bu Binuyi nwa Henadadu; yẹbedua kpuru shita l'ibe Azaríya jasụ lẹ nkuku igbulọ ono.

25 Palalu nwa Uzayi bẹ kpukwaru ẹka dụ l'iphu nkuku igbulọ ono; yẹle ụlo-ephekerephe ono, sefutaru ishi l'ibe eze l'ẹka iya ophu dụ l'uzo imeli mkpukpu ono lẹ mgboru oma ẹka ndu nche anoje.

Onye kpukwaru tsota iya nụ bu Pedaya nwa Paroshi.

26 Ndu eje ozi l'eze-ulo Chileke, bu ndu bu l'úbvú, Ofẹlu bya akpukwaa nkephẹ futa l'iphu Onu-Abata-Mini, nọ l'uzo ẹnyanwu-awawa; yẹle ụlo-ephekerephe ono, sefuru esefu ono.

27 Ndu kpụ-tsotaru phẹ nụ, kpuru ibiya ozo bẹ bu unwoke ndu Tekowa. Ẹphe kpukwaru iphu oke ụlo-ephekerephe ono, sefuru esefu ono; kpua ya jeye o sùbe l'igbulọ Ofẹlu.

28 Ndu uke Chileke bẹ kpukwaru a -gbẹ lẹ Onu-abata Inya kwaseru; onyenonu kpuru ataphu ibe iya.

29 Onye kpuru tsota phe nu bẹ bu Zadoku nwa Ima. Yebedua kpukwaru ataphu ibe iya.

Onye ophu kpuru tsota iya nu buru Shemaya nwa Shekanaya. Yebedua bu onye-nche Onu-abata Enyanwu-awawa.

30 Ndu ozo, kpuru tsota iya nu bu Hananaya nwa Shelemaya; yele Hanunu, bu onye k'ishii l'unwu Zalafu.

Meshulamu nwa Berekaya kpuru tsota phe; eka o kpukwaru bu ataphu ulo iya.

31 Onye ophu kpuru tsota iya bu Malukayijia. Yebedua yi lẹ ndu akpuje uzu mkpola-ododo. O kpukwaru igbulọ nkiya jeye l'ulo ndu eje ozi l'eze-ulo Chileke; me ke ndu ngho l'ataphu Onu-abata Nlele; o kpukwaa ya pho futa lẹ nwulo, du l'eli nkuku igbulọ ono.

32 Ndu akpuje uzu mkpola-ododo; me ndu ngho bẹ kpukwaru mgbaka nwulo ono, du l'eli nkulahu nggoji igbulọ ono; ephe kpua ya jeye lẹ Onu-abata Aturu.

4

Ndu mkposhi ozi ono

1 Sambalatu numae pho l'anyi akpukwawaa igbulọ ono; ehu-eghu ghuahaa ya; mbu o voru oku wua ehu wata aja ndu Jiu ewenu. 2 O nodu l'iphu ndibe phe; me l'iphu ndu ojogu Sameriya pfuahaa su: “?Bu gunu bẹ ndu Jiu-a, bu ndu arwuhu-a eme? ?Ephe eme g'ephe kpukwaa

igbulọ ono tọo ọnu? Mbu-a; ?ephe e-mechaa gwee ngweja tọo? ?Ephe eme g'ephe kpọ-ghee ya l'ujiku lanu tọo? ?Bu g'ephe a-du ike mee ge mkpuma ono dubaa ree ozo? mbu mkpuma ono, ephe voshiru le mkpokpo igbulọ ono, oku gbanwushiru ono."

³ Tobaya, bu onye Amonu, no iya le mgboru su: "Igbulọ mkpuma obu, ephe akpu obu ?o nweru ishi? Iphe, bu agulo -gbakotakpo ya nu lo dakposihu!"

⁴ "Su-a; jiko Chileke anyi; ngabenuru anyi nchi; kele o to dudu iphe, a guberu anyi. Menaa g'ewenu, ephe aja anyi tukoru phe l'ishi. L'i mee g'a lwuta phe l'ogu lashia ali ozo. ⁵ Ta agukwaru phe nvu l'ejo-iphe, ephe meru; te ehuchafukwa iphe-eji phe l'iphu ngu; kele ephe gudewaa okonu kwechia ndu ono, akpukwa igbulọ ono iphu."

⁶ Noo ya; anyi kpu igbulọ ono kpujaha iya ebo le g'o shi hahawaa; kele ndu ono phuberu iphu eje ozi ono.

⁷ Teke Sambalatu; me Tobaya; me ndu Arabu; me ndu Amonu; me ndu Ashidodu numaerupho l'aakpukwa-a igbulọ Jierusalemu ono g'aakpu iya; teme l'eka uzo du iya be akpu-chishiwaa; ehu wata phe eghushi eghe ike. ⁸ Ephe nokobe chia idzu g'ephe bya ogo le Jierusalemu; bya akuru utsu yeru phe. ⁹ Tobudu iya bu; anyi bya epfuru nu Chileke anyi; woru ndu nche ye g'ephe cheje mkpukpu ono nche eswe l'enyashi; g'ephe be eme iphe, ephe chiru idzu iya.

¹⁰ O bu teke ono be ndu Jiuda wataru epfu su: "Ike abvukwa ndu l'eje ozi obu; teme

mkpokpo igbulọ pakwadu-a ẹka; k'ọphu bụ l'anyi ta amadụ g'anyi e-shi kpukwaa igbulọ ọbu.”

¹¹ Ndu ọhogu anyi nọdu epfukwaphọ sụ l'anyi -bya amaru; mbụ l'anyi -bya ahuma phẹ; bẹ ẹphe nọwaa l'echilabọ anyi egbushi anyi; k'ọphu eje ozi ono e-buhu. ¹² No iya; ndu Jiu, bukube phẹ nụ byapfutawa anyi iphe, rwuru ugbo iri bya akaru anyi l'iphe, bukpoobiya ọphu anyi shiru bẹ ndu ọhogu anyi ono e-shikwa byapfuta anyi ọgu.

¹³ Ọo ya bụ; mu bya eye ndu nche l'azụ igbulọ ono; g'ẹphe cheje nche l'ẹka igbulọ ono kachaa mkpulali; mbụ ẹka a kpụ-beru iya ubele. Mu gbaa ndu nche ono l'ipfu l'ipfu; ẹphe pagbaarụ ọgu-echi phẹ; mẹ arwa phẹ; mẹ apfụ phẹ.

¹⁴ Mu bya ahuma g'iphe dụ; mu gbalihu pfiaru ndu a maru ẹpha phẹ; mẹ ndu-ishi; mẹwaro ndu ọzo sụ phẹ: “Unu ta atsushi ndu-a ebvu! Unu nyatanụ Nnajiuphu ono, bụ onye parụ ẹka; bya aburu onye dụ ebvu ono! Unu l'wua ọgu ẹhu ndibe unu; mẹ k'unwu unu unwoke; mẹ k'unwada unu; mẹ k'unyomu unu; mẹ k'unuphu ibe unu.” ¹⁵ Teke ndu ọhogu anyi nūmaru l'ẹjo idzu ono, ẹphe chiru anyi ono bẹ anyi mawaru; mbụ lẹ Chileke mebyiwarụ iya; ọo ya bụ anyi tuko g'anyi ha laphu azụ je akpuaaha igbulọ ono ọzo.

¹⁶ E -shi lẹ mbọku ono kwaseru bẹ nkeru-ẹbo l'unwoke, ejeru mu ozi bụ phẹ jeahaarụ ozi ono; nkeru-ẹbo ọphuna nọdu lẹ nche; parụ arwa; mẹ iphe, eegudeje gbobuta onwonye; mẹ apfụ; yee uwe-ọgu. Ndu-ishi pfuru ndu ọnu-ulo Jiuda l'ọphu l'azụ; ¹⁷ ẹphe nọdu akpụ igbulọ ono. Ndu

ophu evu iphe, e gude eje ozi ono gude ẹka lanu eje ozi ono; gude ẹka ophuu paru ngwoḡu. ¹⁸ Ndu ophu akpu igbulọ ono l'ẹhu l'ẹhu tuchaaru ogu-echi phe l'upfu akpu iya. Onye egbuje opu pfuru mu l'aguga. ¹⁹ Tọbudu iya bu; mu pfuaru ndu a maru ẹpha phe ono; me ndu-ishi ono; me ndu ozowaro su phe-a: "Ozi-a pakwaru ẹka; teme o ha osa shii; o mee anyi nodu onwanyi uzanya uzanya l'igbulọ-a. ²⁰ Iphe, bukpo ẹka unu numaru oda opu ono; unu wuru byapfuta anyi l'ẹka ono. Chileke anyi a-lwuchiru-a anyi oḡu!" ²¹ Noo g'anyi shi jee ozi ono; nkeru-ẹbo nodu apajeru arwa e -shi le nchi-aboḡu jeye l'enyashi teke kpokpode lufutawaru. ²² Iphe ozo, mu pfukwarupho ndu ono teke ono bu: "G'onyenonu yele onye ejeru iya ozi zejekwa l'ime Jierusalemu l'enyashi; k'ophu ephe a-buru anyi ndu nche l'enyashi; teke o beru l'eswe ephe ejee ozi." ²³ G'anyi ha; mbedua; me unwune mu; me ndu-ozu mu; me ndu nche, mu l'ephe no be ta adudu onye eyefuje iphe, o yeru l'ẹhu eyefu. Onyenonu apajeru ngwoḡu iya; o betakporu o buru mini be onye obu eje ekuta.

5

Nehemaya eyeru ndu ukpa ẹka

¹ A nonyaa; unwoke ndu Jiuda; waa unyomu phe wata echi mkpu iphe, ndu Jiuda ibe phe l'eme phe. ² O nweru ndu ophu epfu su: "Anyi l'unwegirima anyi unwoke me unwanyi be ha igwerigwe; oo ya bu g'a hanaa anyi g'anyi chota akpuru ereshi ria nodu ndzu."

³ Ọ dukwarupho ndu ọphu epfu sụ: “Anyi yeru alị anyi l'itumo; yechaa opfu-vayinu anyi; mę ọlo anyi g'ee-shi g'anyi hụma ereshi ria l'egu, eme nụ.”

⁴ Ọ duru ndu ọphu sụru: “Anyi jiwaru ụgwo tụa utu alị anyi; mę k'opfu-vayinu anyi nụ eze.

⁵ A makwaru-a l'anyi lẹ ndu Jiu ibe anyi phẹ bẹ gbaru ụgbugba lanụ. Ọ bụru g'ụnwegirima phẹ dū ree bụ g'ụnwegirima nkanyi dukwapho; obenu l'ụnwegirima anyi unwoke mę ụnwanyi bẹ anyi dobewaru l'ọnodu ohu. Ụnwada anyi nwekwaru ndu ọphu gbẹ bụwaru nụ ohu nta; ọphu anyi ta amadu g'anyi e-me gbafuta phẹ; kele alị anyi mę opfu-vayinu anyi bukotawa ke ndu ọzo.”

⁶ Mu numaepho mkpu ono, ephe echi ono; yele iphe ono, ephe epfukashi ono; ehu wata mu eghushi eghu ike. ⁷ Mu bya arichaa iphe ono l'ime onwomu; mu bobbe iya ndu a maru epha phẹ mę ndu-ishi. Mu sụ phẹ: “Ọ kwa ndu Jiu ibe unu bẹ unu anatajẹ ụgwo ntukwase.” Mu bya ekua ndzukọ, ha shii g'a chia idzù g'ee-shi nua phẹ chiipfu. ⁸ Mu sụ phẹ: “Nta-a bẹ anyi kukeberu ehu gbafuta unwune anyi, bụ ndu Jiu, e shi ree ndu ọhozo. Unubedua bya nta-a bya ereshiahaa unwune unu ono ọzo g'anyi zuphuaha phẹ azu.” Mu pfuchaa nno; ephe daa ke nyonyoronyo; ọphu ephe ta amadu iphe, ephe epfu.

⁹ Mu sukwa phẹ phọ ọzo: “Iphe, unu eme ta adukwa ree. ?Tọ gbaduru g'unu tsua Chileke anyi ebvu k'ọphu ndu ọhozo, bụ ndu ọhogu anyi ata watadu anyi aja ewenu? ¹⁰ Mbẹdua;

mẹ unwune mu; mẹ ndu-ozì mu bẹ ejiejekwa ndibe anyi ụgwò okpoga mẹ ụgwò ereshi. Ọle ọo g'anata ụgwò ntụkwase laa! ¹¹ Unu nụ-phukọta phẹ alị phẹ azụ ntanụ-a; mẹ opfu-vayinu phẹ; mẹ mgbabu olivu phẹ; mẹ ụlo phẹ. Unu eworu ntụkwase, unu natarụ phẹ l'okpoga; mẹ l'ereshi; mẹ lẹ mee; mẹ lẹ manụ nụ-phukọta phẹ azu.”

¹² Ẹphe tuko sụ: “Anyi a-nụ-phukọta iphe ono azu. Ọ tọ dudu iphe, anyi a-suba g'ẹphe nụ anyi ọzo. Ọo ẹpho g'ị sụru g'anyi mee bụ g'anyi e-me.”

Mu bya ekua ndu-uke Chileke; woru nte nụ ndu a maru ẹpha phẹ ono; mẹ ndu-ishi g'ẹphe mee iphe ono, ẹphe kweru ukwe iya ono. ¹³ Mu bya aja uwe mu phulaphula sụ: “G'ọ bụkwaru ẹgube-a bẹ Chileke a-jifu ndu te emeduru iphe, ẹphe kweru ukwe iya; mbụ jifu phẹ l'ulo phẹ; mẹ l'iphe, ẹphe nweru. G'ọ bụkwaru nno bụ g'aa-jifu onye ono; gbabẹ iya ẹka ọto!”

Ndzuko ono l'ophu tuko zua mgbede sụ: Nokwa g'ọ dū. Ẹphe jaa Chipfu ajaja. Ndu ono mee iphe ono, ẹphe kweru ukwe iya ono.

Nehemaya ta abudu ẹhu iya b'ọ maru nwẹkiya

¹⁴ E -shi lẹ teke a tūru mu ẹka gẹ mu bụru ọchi-ọha l'alị Jiuda; mbụ l'apha, kwe Atakuzakuzesu apha ụkporo jeye l'apha, kwe iya ụkporo apha l'apha iri l'ẹbo, ọ watarụ aburu eze; l'ime apha iri l'ẹbo ono bẹ mbedua; mẹ unwunna mu ta adudu onye ophu rijeru nri, gbaru ọchi-ọha. ¹⁵ Obenu lẹ ndu ọchi-ọha ophu vu mu ụzo bụru ishi bẹ shi bo ndu Jiuda ivu anyinyi; shi anakọje phẹ nri mẹ mee; bya eyekoberu mkpọla-ọchaa, ẹrwa iya dū ụkporo shẹkelu labọ, ẹphe shi atuje. Nokwapho

gẹ ndu shi ejeru pẹ ozi shi akpa ndu Jiuda ono ẹhu. Ọle mbedua gude atsu Chileke ebvu ọphu mu te emeduru ẹgube ono. ¹⁶ Mu gbẹ yechiaru ẹhu lẹ k'akpu igbulọ ono; ọphu ọ dudu alì, anyi zuru m'ilile. Ndu ozi mu g'ẹphe ha dzukotaephoeje ozi ono l'ẹka ono. ¹⁷ Ọzo buru lẹ ukporo umadzu ẹsaa l'umadzu iri; mbu ndu Jiu; mẹ ndu bu ndu-ishi bẹ anọduje eri nri lẹ teburu mu; yekoberu ndu eshije l'ohamoha, no-pheru anyi mgburugburu byapfuta anyi. ¹⁸ Mbọku-mbọku bẹ eegbuje oke-eswi lanu; waa aturu ishii, ẹhu du ree; mẹ oku gude shiaru mu nri. Abali iri, nwutaru anwuta bẹ eevutajeru mu mẹ, du iche iche; vuta iya k'etsutsu. A makwaru-a l'iphemiphe ono dukota; ọle mu ta asujeduru g'a nu mu oke nri, rwuberu ọchi-ọha; noo kele ivu-erwa ndu Jiuda vu bẹ panukaru ẹka.

¹⁹ Jiko Chileke mu; nyatakwa mu ro lẹ k'oma l'iphemiphe-a, mu mekotaru ndu-a.

6

Ejo idzu, a chiru Nehemaya

¹ Sambalatu; mẹ Tobaya; mẹ Geshemu, bu onye Arabu; mẹ ndu ohogu anyi ozo bya anuma lẹ mu kpu-ghewaru igbulọ ono; ọphu ọ to dudu ẹka ghekwaduru iya onu; ọle teke ono bẹ mu teke yeshidu mgbo l'oguzo iya. ² Sambalatu yele Geshemu zia mu ozi su gẹ mu bya gẹ mu l'ẹphe dzuda lẹ mkpukpu lanu, du lẹ baswaa alì, aza Ono. Obenu l'iphe, ẹphe chiru idzu iya bu g'ẹphe meka mu iphe. ³ Mu zia ndu-ozi g'ẹphe je ezia pẹ su pẹ: "Ozi, mu gude l'ẹka bẹ pakwaru ẹka.

Mu ta abyakotakwa. ?Denu gę mu e-shi parụ ozi ono haa g'ọ rwuhu lę mu abya unu aza oku?"

⁴ Ugbo ęno bę ęphe ziru mu ozi lanu ono; ọ buru onu, mu yehawaru bę bu onu, mu yekotaru phe.

⁵ O be lę k'ise iya; Sambalatu zia nwozi iya g'o gude ozi lanu ono byapfuta mu. Ọ buru ękwo-ozu, e gheberu onu bę o gude bya. ⁶ L'ime ękwo ono bę o deru su:

"Iphe, ngakotaru ohamoha; teme Geshemu gbakwaapho ama iya bu lę gu lę ndu Jiu bę agba idzu g'unu kwefu ike; ọ buru iya meru iphe unu akpukwa igbulo ono. Iphe ozo, e pfuru ye iya bu l'oo gubedua eme g'i buru eze phe. ⁷ Ozo bu l'i gbę hotawa ndu mpfuchiru g'ęphe je araa k'opfu ęhu ngu arara lę Jierusalemu su l'i bu eze ndu Jiuda. O doru ngu ęnya l'opfu ono e-rwu eze lę nchi. Oo ya bu l'ọ kakwa ree g'i byakwa g'anyi chi-zia ya achi-zi."

⁸ Mu ziphu iya ozi azu su iya: "Iphe ono, iipfu ono ta adukwa ophu meru ememe ilile; ọ kwa l'obu ngu bę i ritaru iya pfua."

⁹ Iphe ono bu iphe, ęphe eme g'anyi tsuhu ebvu; kele ęphe riru l'anyi a-paru ozi ono haa; anyi te ejefuedu iya l'ishi. Ole mu rworu Chileke su iya: "Jiko menaa g'eka shihu mu ike."

¹⁰ O be teke mu jeru l'ulo Shemaya nwa Delaya, mbu nwanwa Mehetabelu, bu onye ta lufujedu alufu l'ibe iya; ọ su gę mu l'iya dzuda l'ulo Chileke; l'ime ime eze-ulo ono; g'anyi gu-chishia mgbo, du l'eze-ulo ono agu-chishi; l'o nweru ndu l'a-bya mu egbugbu; l'oo l'enyashi bę ęphe a-bya mu egbugbu obu.

11 Ole iphe, mu pfuru bu: “?Bu onye du ge mbedua be a-gbalaaha agbala? Mbu ?bu onye du ge mbedua be a-gbaru lashia l'eze-ulo Chileke ge mu dzota ndzu mu? Mu te ejedu.”

12 O buru teke ono be o byaru edoo mu enya l'o to budu Chileke be ziru iya nu; l'oo Tobaya yele Sambalatu pfuru iya ugwo g'o pfua iphe, a-tsuru mu nu. 13 Ephe pfuru iya ugwo g'o yee mu ebvu; k'ophu mu e-me iphe, o suru ge mu mee; shi nno mee iphe-eji; g'ephe e-nweru iphe, ephe a-gbabe okpa gube mu ejo epha; mee mu iphe-iphere.

14 Gube Chileke mu; ta azohakwa iphe, Tobaya yele Sambalatu meru mu. Nokwapho gi tii zohakwapho nwanyi mpfuchiru ono, bu Nowa-daya; me ndu mpfuchiru ozo, shi eme g'ephe yee mu ebvu.

Aakpu-ghe igbulo ono

15 Noo ya; iphe, a kpuru igbulo ono bu ukporo abali labo l'abali iri l'ebo. Mboku, a kpu-gheru iya bu l'ukporo abali l'abali ise l'onwa Elulu.

16 Ndu ohogu anyi l'ophu; me iphe, bu ndu ohozo, bupheru anyi mgburugburu numae ya pho; ephe pehu onwophe l'enya; noo kele o byaru edoo phe enya l'ozi ono be bu Chileke anyi yeru anyi aka; anyi jefu iya l'ishi.

17 Le teke ono be ndu a maru epha phe l'ali Jiuda nuru Tobaya ekwo-ozu, du igwerigwe. Ekwo-ozu ophu shi Tobaya l'eka ndu anodujekwapho abyaru phe. 18 Noo kele ndu du igwerigwe l'ali Jiuda be riru nte turu ikè yeru iya; kele o bu ogo Shekanaya nwa Ara; teme nwa iya nwoke, bu Jiehohananu lukwaapho

nwada Meshulamu nwa Berekaya. ¹⁹ Teme ephe nodu anodujekwapho epfushiru mu iphe, du ree, Tobaya l'emegbabe. Iphe, mu pfuru; ephe aturuta iya je edooru iya. Tobaya nodu edetajeru mu ekwo ge ya gude yee mu ebvu.

7

¹ A kpughechaa igbulo ono; mu bya eyeshikota iya mgbo. A bya aho ndu nche onu-oguzo; me ndu ebvu; me ndu Liviayi. ² Ndu mu meru ishi ndu Jierusalemu bu nwune mu Hanani; yele Hananaya, bu onye-ishi ulomgbobuta. Noo kele Hananaya bu onye e gude ire iya aka; teme o ka atsule Chileke ebvu eme l'igwerigwe ndu ozo. ³ Iphe, mu pfuru phe bu: "G'a ta aguhajekwa onu-abata Jierusalemu ghebe onu l'ebe abu l'enyanywu gbakotaru. O buru le ndu nche nokwadu le nche; g'a guchishije mgbo iya aguchishi swobechaa ya mgborigwe. Unu shi le ndu bu le Jierusalemu hota ndu nche; g'ephe cheje nche l'eka du k'eche nche; ndu ophuu anodu l'iphu ulo phe eche."

*Ndu shi l'eka a kpuru phe le ndzu lwa
(Ezu 2:1-70)*

⁴ Jierusalemu bu eze mkpukpu, ha shii bya aha ke phorokotokongu; ophu ndu no iya nu abadu nwishi; teme ophu o dudu ulo, a kpwaru iya. ⁵ Tobudu iya bu; Chileke mu yee mu iya l'obu ge mu kukoo ndu ono, a maru epha phe ono; me ndu-ishi; mewaro ndu ozo g'e deshia epha phe l'eri phe l'eri phe. Mu bya ahuma ekwo, e deshiru epha ndu vu uzo, shi l'eka a kpuru phe

lẹ ndzụ lwa; mbụ ẹkwọ, e deshiru phẹ l'eri phẹ l'eri phẹ. Iphe, mu hụmaru, e deru l'ẹkwọ ono bụ:

⁶ Waa ndu Ízurelu ono, shi l'alị Bábilonu lwa; mbụ ndu ono, a kpụjeru lẹ ndzụ laa alị ọzo, bụ iya bụ ndu Nebukadineza, bụ eze ndu Bábilonu kpụkojeru laa Bábilonu ono. Ẹphe lwaru Jierúsalemu; mẹ Jiuda; onyenonu lashichaa mkpụkpu ẹka o shi. ⁷ Ndu ẹphe tso lwa bẹ bụ Zerúbabelu; mẹ Jieshuwa; mẹ Nehemaya; mẹ Azaríya; mẹ Ramaya; mẹ Nahamani; mẹ Mọdekayi; mẹ Bilishanu; mẹ Misuperetu; mẹ Biguvayi; mẹ Nahumu; mẹ Bana.

Waa gẹ ndu Ízurelu ono ha bụ ọwana:

⁸ Oshilọkpa Paroshi bẹ dụ ọnu ise l'ụkporo ẹsato l'ụmadzu iri l'ẹbo.

⁹ Oshilọkpa Shefataya dụ ụkporo iri l'ẹsato l'ụmadzu iri l'ẹbo.

¹⁰ Oshilọkpa Ara dụ ọnu nemadzụ l'ụkporo iri l'ẹbo l'ụmadzu iri l'ẹbo.

¹¹ Oshilọkpa Pahatu-Mówabu, bụ iya bụ ndu shi l'eri Jieshuwa yẹle Jiowabu bẹ dụ ọnu ẹsaa l'iri l'ẹsato.

¹² Oshilọkpa Elamu dụ ọnu ẹto l'ụkporo labọ l'ụmadzu iri l'ẹno.

¹³ Oshilọkpa Zatu dụ ọnu labọ l'ụkporo labọ l'ụmadzu ise.

- 14 Oshilokpa Zakayi dụ unu
nemadzu l'ukporo iri l'esato.
- 15 Oshilokpa Binuyi dụ unu
l'umadzu ukporo iri l'ebo
l'umadzu esato.
- 16 Oshilokpa Bebayi dụ unu
l'umadzu ukporo iri le
nanu l'umadzu esato.
- 17 Oshilokpa Azugadu dụ unu
ise l'ukporo iri l'ishii
l'umadzu labo.
- 18 Oshilokpa Adonikamu dụ
unu l'ukporo iri l'eto
l'umadzu esaa.
- 19 Oshilokpa Biguvayi dụ
unu ise l'ukporo eto
l'umadzu esaa.
- 20 Oshilokpa Adinu dụ unu
ukporo iri l'ebo l'umadzu
iri l'ise.
- 21 Oshilokpa Ateya, bu iya bu
ndu shi l'eri Hezekaya be dụ
ukporo eno l'umadzu iri
l'esato.
- 22 Oshilokpa Hashumu dụ
ukporo iri l'ishii l'umadzu
esato.
- 23 Oshilokpa Bezayi dụ ukporo
iri l'ishii l'umadzu eno.
- 24 Oshilokpa Harifu dụ ukporo
ise l'umadzu iri l'ebo.
- 25 Oshilokpa Gibiyonu dụ
ukporo eno l'umadzu iri
l'ise.

- 26 Unwoke, shi lẹ Bẹtulehemu
mẹ Netofa bẹ dọ ụkporo tete
l'ụmadzu ẹsato.
- 27 Ndu kẹ Anatotu dọ ụkporo
ishii l'ụmadzu ẹsato.
- 28 Ndu kẹ Bẹtu-Azumavetu
bẹ dọ ụkporo labọ
l'ụmadzu labọ.
- 29 Ndu kẹ Kiriyatu-Jiarimu;
mẹ Kefira; mẹ Berotu dọ
unu l'ụkporo iri l'ẹsaa
l'ụmadzu ẹto.
- 30 Ndu kẹ Rama; mẹ Geba dọ
unu l'ụkporo iri lẹ nanu
l'onye lanu.
- 31 Ndu kẹ Mikumashi dọ ụkporo
ishii l'ụmadzu labọ
- 32 Ndu kẹ Bẹtelu; mẹ Eyayi dọ
ụkporo iri lẹ nanu l'ụmadzu
ẹto.
- 33 Ndu kẹ Nebo ophunapho
bẹ dọ ụkporo labọ l'ụmadzu
iri l'ẹbo.
- 34 Ndu kẹ Elamu ophunapho bẹ
dọ unu ẹto l'ụkporo labọ
l'ụmadzu iri l'ẹno.
- 35 Ndu kẹ Harimu dọ ụkporo iri
l'ishii.
- 36 Ndu kẹ Jieriko dọ ụkporo iri
l'ẹsaa l'ụmadzu ise.
- 37 Ndu kẹ Lodu; mẹ Hadidi;
mẹ Ono bẹ dọ unu l'ụkporo
iri l'ishii l'onye lanu.
- 38 Ndu kẹ Senaa dọ unu tete

l'ụkporo iri l'ishii l'ụmadzu
iri.

- 39 A bya ịe ndu-uke Chileke:
Oshilọkpa Jiedaya, bụ iya bụ
ndu shi l'ọnu-ulo Jieshuwa
be du unu labo l'ụkporo
esato l'ụmadzu iri l'eto.
- 40 Oshilọkpa Ima du unu labo
l'ụkporo iri l'ebo l'ụmadzu
iri l'ebo.
- 41 Oshilọkpa Pasho du unu eto
l'ụkporo labo l'ụmadzu esaa.
- 42 Oshilọkpa Harimu du unu
labo l'ụkporo iri l'ụmadzu
iri l'esaa.
- 43 A bya ịe ndu Lívayi:
Oshilọkpa Jieshuwa; me
Kadumelu, bụ iya bụ
ndu shi l'eri Hodavaya be
du ụkporo eto l'ụmadzu iri
l'eno.
- 44 A bya ịe ndu aguje ebvu:
Oshilọkpa Asafu be du
ụkporo esaa l'ụmadzu esato.
- 45 A bya ịe ndu nche onu-abata:
Oshilọkpa Shalumu; me
oshilọkpa Ateya; me oshilọkpa
Talumonu; me oshilọkpa
Akubu; me oshilọkpa Hatita;
me oshilọkpa Shobayi be
tukoru du ụkporo ishii
l'ụmadzu iri l'esato.
- 46 Ndu anoduje eje ozi l'eze-ulo

Chileke bu:

Oshilokpa Ziha; me
oshilokpa Hasufa;
me oshilokpa Tabayotu;
⁴⁷ me oshilokpa Kerosu;
me oshilokpa Siya; me
oshilokpa Padonu;
⁴⁸ me oshilokpa Lebana;
me oshilokpa Hagaba; me
oshilokpa Shamulayi;
⁴⁹ me oshilokpa Hananu;
me oshilokpa Gidelu;
me oshilokpa Gaharu;
⁵⁰ me oshilokpa Reyaya;
me oshilokpa Rezinu; me
oshilokpa Nekoda;
⁵¹ me oshilokpa Gazamu;
me oshilokpa Uza; me
oshilokpa Paseya;
⁵² me oshilokpa Besayi;
me oshilokpa Meyuni;
me oshilokpa Nefsimu;
⁵³ me oshilokpa Bakubuku;
me oshilokpa Hakufa;
me oshilokpa Hahuru;
⁵⁴ me oshilokpa Bazulutu;
me oshilokpa Mehida;
me oshilokpa Hasha;
⁵⁵ me oshilokpa Bakosu;
me oshilokpa Sizera;
me oshilokpa Tema;
⁵⁶ me oshilokpa Nezaya;
me oshilokpa Hatifa.

57 A bya lẹ ndu bu oshilokpa
ndu-ozì Sólomonu bu:

Oshilokpa Sotayi;

mẹ oshilokpa Soferetu;

mẹ oshilokpa Perida;

58 mẹ oshilokpa Jiala; mẹ

oshilokpa Dakonu; mẹ

oshilokpa Gidelu;

59 mẹ oshilokpa Shefataya;

mẹ oshilokpa Hatilu; mẹ

oshilokpa Pokeretu-Hazebayimu;

mẹ oshilokpa Amonu.

60 Ndu eje ozi l'eze-ulo

Chileke g'ẹphe ha; mẹ oshilokpa

ndu-ozì Sólomonu bẹ dọ

ukporo iri lẹ tete l'umadzu iri

l'ẹbo.

61 Ndu owana bu ndu ophu shi lẹ mkpukpu
Telu-Mela; mẹ lẹ mkpukpu Telu-Hasha; mẹ lẹ
mkpukpu Kerubu; mẹ lẹ mkpukpu Adonu; mẹ
lẹ mkpukpu Ima lwa. O lẹ ndu ono ta adudu
ike goshi onu-ulo, ẹphe shi futa; mẹ oshilokpa
onye ẹphe bu; k'ophu ee-shi nno maru ?ẹphe
bua ndu Izurelu? 62 Oshilokpa Delaya; mẹ
oshilokpa Tobaya; mẹ oshilokpa Nekoda bẹ dọ
unu l'ukporo iri l'ẹbo l'umadzu labo.

63 A bya l'oshilokpa ndu-uke Chileke: os-
hilokpa Hobaya; mẹ oshilokpa Hakozu; mẹ
oshilokpa Bazilayi; nwoke ono, luru nwada
Bazilayi k'alì Giladu; a nodu ekuwa iya rọ ẹpha
ala l'ẹpha iya. 64 Ndu ono bẹ a choru ẹpha pẹ
l'ekwo, e deru g'e gude nwushia pẹ; o lẹ a ta
ahumaduru ẹpha pẹ l'ekwo ono. Oo ya bu; e

wofu phẹ g'ẹphe ta abụheru ndu-uke Chileke; dobe phẹ gẹ ndu aasọ nsọ. ⁶⁵ Ọchi-ọha bya asụ g'ẹphe ta ayijeshiru ria nri, kakọta adu nsọ jasụ teke ee-nweru onye uke Chileke, e-gude ido Urimu; waa Tumimu kpata Chipfu ishi.

⁶⁶ A -kpakọta igwe-ọha ono bẹ ẹphe dụ ụkporo unu ise l'unu ise l'ụkporo iri l'ẹsato;* ⁶⁷ a -gụfukwa ndu-ozì phẹ unwoke; mẹ unwanyi, ndu dụ unu iri l'ẹsato l'ụkporo ishii l'ụmadzu iri l'ẹsaa. Ẹphe nwekwarupho ụkporo ụmadzu iri l'ẹbo l'ụmadzu ise, bụ unwoke yẹle unwanyi, anọduje agụ ebvu; ⁶⁸ bya enweru inya, dụ unu l'ụkporo iri l'ishii l'inya iri l'ishii. Ẹphe nweru inya-mulu, dụ ụkporo iri l'ẹbo l'inya-mulu ise. ⁶⁹ Inya-kamẹlu phẹ dụ unu l'ụkporo l'iri l'ise; bya enweru nkapfụ-igara, dụ unu iri l'ishii l'ụkporo iri l'ishii.

⁷⁰ O nweru ndu-ishi l'ẹnya-unuphu ibe nna phẹ, nuru iphe g'e gude yeta ẹka jee ozi ono. Ọchi-ọha bẹ yeru ẹkpa mkpọla-ododo iri l'ụlo-ẹku; mẹ gbamugbamu, dụ ụkporo labọ l'iri; mẹ uwe ndu-uke Chileke, dụ unu uwe l'ụkporo ishii l'iri. ⁷¹ Ndu bụgbaa ishi l'ẹnya-unuphu ibe nna phẹ haru woru mkpọla-ododo, dụ ụkporo unu ugbo labọ l'unu iri; nụ g'e dobe l'ụlo ẹku, ee-gudeje jee ozi ono; bya anụ mkpọla-ọchaa, dụ ụkporo unu ugbo iri l'ẹto l'unu iri l'ise. ⁷² Mkpakọ iphe, ndu ọzo nuru bụ mkpọla-ododo, dụ ụkporo unu ugbo labọ l'unu iri; mẹ mkpọla-ọchaa, dụ ụkporo unu ugbo iri l'ẹbo l'unu iri; mẹ uwe ndu-uke Chileke, dụ ụkporo ẹto l'ẹsaa.

* **7:66** 7:66 Bụ iya bụ 42,360 lẹ mbekee.

⁷³ Tɔ̀budu iya bụ; ndu-uke Chileke; mę ndu Lívayi; mę ndu nche ɔnu-ɔguzo; mę ndu aguje ebvu; mę ndu eje ozi l'eze-ulo Chileke; męwaro ndu ɔzo; mę ndu Ízurelu g'ephe ha tuko buchaaru lę mkpukpu lę mkpukpu phe.

8

Ẹzura agu ẹkwo ekemu Chileke

¹ O rwua l'onwa k'esaa teke ndu Ízurelu bukɔtawa lę mkpukpu lę mkpukpu phe; ndu Ízurelu g'ephe ha dzukota l'edupfu, nọ l'iphu mkpochi-oguzo, Ọnu-Abata-Mini. Ẹphe sụ Ẹzura, bụ onye edeje ẹkwo g'o wofuta ẹkwo ekemu Mosisu, bụ iya bụ ekemu, Chipfu turu nụ ndu Ízurelu. ² O be l'abali mbụ l'onwa esaa; Ẹzura, bụ onye uke Chileke wofuta ẹkwo ekemu ono l'iphu edzudu-oha l'eka unwoke mę unwanyi; mę ndu iphe edoje enya dọru. ³ Ọ nọdu l'edupfu ono, dụ l'iphu Ọnu-Abata-Mini ono gwa ẹkwo ekemu ono l'eka unwoke mę unwanyi; mę ndu ono, iphe edoje enya dọru ono. Ọ shi l'onmewa utsu gwa ya jasụ l'echilabọ eswe. Edzudu-oha ono ngabę nchị ree l'iphe, ẹkwo ekemu ono epfu.

⁴ Ẹzura, bụ onye edeje ẹkwo bę pfuru l'eli ẹka a gbaru oshi agbagba, bụ ẹka e meru medoru k'iphe, ẹphe eme ono. Ndu pfuru iya l'ekutara bụ Matitaya; mę Shema; mę Anaya; mę Uráya; mę Hilikaya; mę Maseya. Ndu pfuru iya l'ekicha buru Pedaya; mę Mishelu; mę Malukayijia; mę Hashumu; mę Hashubadana; mę Zekaraya; mę Meshulamu. ⁵ Ẹzura bya ekpuhaa ẹkwo ono;

ephe humakota; noo kele eka o pfuru be o kakota ndu ono l'eli. Teke o kpuharu iya be ephe tukoru wulihu pfuru apfuru. ⁶ Ezura jaa Chipfu ajaja; mbu Chileke ono, paru eka ono.

Ndu ono chilikota eka phe imeli zua su: "Nokwa g'o du! Nokwa g'o du-o!" Ephe phozeta kpube iphu l'ali baaru Chipfu eja. ⁷ Ndu Lívayi, bu Jieshuwa; me Bani; me Sherebaya; me Jiaminu; me Akubu; me Shabetayi; me Hodaya; me Maseya; me Kelita; me Azariya; me Jiozabadu; me Hananu; me Pelaya be yetaru eka mee g'ekemu ono doo ndu ono enya g'ephe pfukwaduru l'eka ono. ⁸ Ephe gua iphe, du l'ekwo ekemu Chileke ono risaa; bya akoo iphe o bu; mee iphe ono, a guru ono dokota enya.

⁹ Ochi-oha, bu Nehemaya; me Ezura, bu onye uke Chileke; buru onye edeje ekwo; me ndu Lívayi, bu ndu ezi ndu ono ekemu ono bya epfukota opfu nu ndu ono su phe: "Ntanua bukwa mboku, duru Chipfu, bu Chileke unu nsò. Unu ta agukwa aphu; ophu unu arakwa ekwa." Iphe, kpataru ephe pfua nno bu le ndu ono g'ephe ha wataru ara ekwa g'ephe numaru iphe, ekemu ono pfuru. ¹⁰ Nehemaya su phe: "Unu lashwaro je eria okpobe nri; unu angua mee, l'atsò rengurengu; unu ewota je anu ndu ophu te enwedu ophu ephe shiru g'ephe ria. Ntanu-a dukwaru Nnajiuphu nsò. Unu ta arashi ekwa; noo kele ehu-utso ophu shi l'eka Chipfu be bu ike, du unu."

¹¹ Ndu Lívayi gboo ndu ono g'ephe ha ekwa; asuje phe: "Unu nodu doo; kele ntanu-a bukwa mboku, du nsò. Unu ta arashi ekwa." ¹² Ndu

Ízurelu g'ephe ha wúkishihu lashia je eria ngua; wojechaaru ndu ozo nri; mbu gude ehu-utso bo obo-iphe ono; noo kele opfu ono, a guru phe ono be doru phe enya.

Obo-Mkpù

¹³ O be le mboku k'ebo iya; ndu-ishi, shi l'enya-unuphu l'enya-unuphu ndu Ízurelu; me ndu-uke Chileke; me ndu Lívayi wuru bya ado-pee Ezura, bu onye edeje ekwo g'ephe nwua iphe, ekemu ono pfuru. ¹⁴ Epe huma l'e deru l'ime ekwo ekemu ono le Chipfu shi l'eka Mosisu tua ekemu su; le ndu Ízurelu be e-bujeru l'ime m̀kpù le teke aabo obo-iphe l'onwa esaa. ¹⁵ Wakwapho l'oo g'ephe raa ya arara; mee g'a numa-dzuru iya le mkpukpu phe l'ophu; yele Jierusalemu su: "Unu tugbua je l'ubvu je egbukoo ekali-oshi olivu; me ekali-oshi payinu; me ke mituru; me igu; me ekali-oshi ozo, nweru ekwo; g'e gude tushia m̀kpù egube ono, e deru iya l'ekwo ekemu ono."

¹⁶ Oo ya bu; epe tugbua je egbukoo ekali-oshi ono bya atushiaru onwophe m̀kpù; onyenonu tua nkiya l'eli ulo iya; me l'oma-unuphu phe; me l'oma-unuphu eze-ulo Chileke; me l'edupfu ono, no-kube Onu-Abata-Mini; me ophu no-kube Oguzo Ifuremu. ¹⁷ Igwe-oha ono, bu ndu shi l'eka a kpuru phe le ndzu lwa ono; tushikota m̀kpù ono buru. Mbu le ndu Ízurelu ta atujeduru egube Mkpù ono; e -shi teke Jioshuwa nwa Nunu no jeye mboku ono. Ehu tsoo phe utso shii.

18 Ẹzura shiẹpho e -shi kẹ mbọku mbụ, a wataru abo obo-iphe ono aguepho iphe, e deru l'ekwo ekemu Chileke ono; ague ya pho mbokumbo; jeye le mbokum ikpazu iya. Epehe bo obo-iphe ono abali esaa; o be le mbokum k'esato; epehe nweru ndzukọ, du iche egube ekemu pfuru iya.

9

Ndu Izuru akoshi iphe-iji, epehe meshiru

1 Onwa ono dupleho l'abali ukporo l'eno; ndu Izuru dzukota swiahaa egu. Epehe yee uweaphu; kporu eja kpua onwophe l'ishi. 2 Ndu ophu bu oshilokpa ndu Izuru bufu onwophe l'ehu ndu ohozo. Epehe pfuru koshia iphe-iji, epehe meshigbaberu; me ejo-ememe, nna phe megbaberu. 3 Epehe pfuru l'eka epehe pfuru gua iphe, e deru l'ekwo ekemu Chipfu, bu Chileke phe ono awa eto; epehe gude awa eto ozo koshia iphe-iji, epehe meshiru; bya abaru Chipfu, bu Chileke phe eja. 4 Ndu pfuru l'eli mkpogobe aka ono e metaru ndu Liviayi ono bu: Jieshuwa; me Bani; me Kadumelu; me Shebanaya; me Buni; me Sherebaya; me Bani; me Kenani. Epehe chiru mkpu ekwa chiku Chipfu, bu Chileke phe.

5 Ndu Liviayi, bu Jieshuwa; me Kadumelu; me Bani; me Hashabuneya; me Sherebaya; me Hodaya; me Shebanaya; me Petahaya bya asu:

“Unu gbalihu jaa Chipfu, bu Chileke unu ajaja; mbu onye ono, shi l'ojeje node ndu; teme o je a-no jasu l'ojeje ono.”

G'a jakwaa ẹpha ngu ono,
 ụ akpabiri ono ajaja;
 mbụ ẹpha ngu ono,
 daghataru ajaja, aaja iya;
 bya adaghata ekele,
 eekeleje iya ono.

⁶ Ọo ngu kpoloko kpẹekpu
 bụ Chipfu.

Ọo ngu meru igwe; mee igwe
 ọphu kakọta igwe l'eli;
 mẹ iphemiphe, ụkọta
 iya nụ.

Ọ bụru ngu meru alị;
 mẹ iphemiphe, ụkọta iya nụ.

Ọ bụru ngu meru eze-ẹnyimu;
 mẹ iphemiphe, nọkọta iya nụ.

Ọ bụru ngu meru;
 ẹphe nọdukọta ndzụ.

Iphe, ụgbaa l'imigwe anọduje
 abakọtaru ngu ẹja.

⁷ Ọo gụbedua bụ Chipfu,
 bụ Chileke ono,
 bụ onye họtaru Ebiramu;
 dufuta iya lẹ mkpukpu
 Uru l'alị Babilonu bya
 agbanwee ẹpha iya;
 ọ bụru Ẹbirhamu.

⁸ I hụmaru l'ọ bụ onye e gude
 ire iya ẹka; gụ l'iya woru
 ndzụ gbaa.

I kwee ya ukwe l'ii-nụkọta
 yẹle awa iya alị ndu Kénanu;
 mẹ alị ndu Hetu; mẹ alị ndu

Amọru mẹ kẹ ndu Pérezu;
 mẹ kẹ ndu Jiebusu;
 mẹ kẹ ndu Gigashi.

Ukwe-iphe ono, i kweru ono
 bẹ i mekọtaru kele i bu onye
 pfuluberu-eka-oto.

⁹ I humaru iphe-ehuka, nna anyi
 phe jeru l'ali Ijiputu.

Teme i numakwapho ekwa,
 ephe rarụ l'aguga Eze-enyimu
 Uswe-uswe.

¹⁰ I meshiru iphe-ohumalenya
 mẹ iphe, du biribiri kpua
 Fero mẹ ndu-ozu iya l'ophu;
 mekpoo ndu ali iya l'ophu;
 kele i maru ge ndu Ijiputu
 gude eku-onwonye gwaa
 ndibe ngu maa.

I meru a maru epha ngu;
 o du egube ono byasu ntanu.

¹¹ I meru eze-enyimu; o kekaha
 ebo l'iphe phe; k'ophu bu
 l'ephe jeru ije l'ali okponku
 ghaa eze-enyimu ono.

Obenu le ndu achị phe oso be
 i tubaru l'ohu mini ono;
 ge mkpuma, a tubaru l'ime
 mini, abya gbukugbuku.

¹² Eswe be i gude urwukpu,
 kpuru oronmono dua
 ndibe ngu.

L'enyashi be i gude oku,
 kpuru oronmono dua phe;

g'ọ bụru ìphóró, a-nọdu
egoshi phẹ ụzo, ẹphe e-shi.

13 I nyizetaru l'eli úbvú
Sayınayi; ị nọdu l'imigwe
pfuru opfu nụ phẹ.

Ị nuru phẹ omelali, pfuru
nhamunha;
mẹ ekemu, bụ ọkpobe iya;
mẹ iphe, ị tọru ọkpa iya,
bụ iphe, dụ ree.

14 I meru; ẹphe maru mbọku,
i doberu g'ọ bụru
eswe-atuta-unme ngu, dụ nsọ.

I shi l'ẹka nwozi ngu,
bụ Mosisu karu phẹ ekemu,
ẹphe a-nọdu etso.

15 Teke ẹgu guru phẹ bẹ ị nuru
phẹ nri, shi l'imigwe.

I kee phẹ mini, shi l'eze mkpuma
g'ẹphe ngua; teke mini
guru phẹ.

Ị sụru phẹ g'ẹphe tughua je
anata ali ono, i riburu nte
l'ii-nụ phẹ ono.

16 Ọle ẹphebe nna anyi phẹ ono
bẹ kuaharu onwophe ekuku;
kwefu ike jika eme iphe,
ị sụru g'e meje.

17 Ẹphe jikaru eme iphe, ị sụru
g'ẹphe mee;
zohashicha iphe, dụ biribiri,
i meshiru l'echilabọ phẹ.

Ẹphe kwefuru ike gude ekwefu

ike hōta onye-ishi, e-duphu
 phẹ azu lẹ Ijiputu,
 bu ẹka ono, ẹphe shi buru
 ohu ono.

Obenu l'ị bu Chileke, l'aguje
 nvu;
 ị buru onye emeje eze-iphe-oma;
 mẹ onye obu-imemini;
 teme ị buru onye ẹhu te
 eghujedu eghu ẹgwegwa;
 mbu onye n-yemobu
 iya nyiberu anyibe;
 o buru iya meru g'o gude
 ophu ị paduru phẹ haa.

18 Je akpaa lẹ teke ẹphe kpuru
 onwophe nweswi su:

Owaa bu Chileke unu,
 bu onye dufutaru unu
 l'ali Ijiputu!

Mẹ teke ẹphe pfubyishiru
 ẹpha ngu njọ epfubyishi
 ono.

19 Obenu l'i gude eze
 obu-imemini ngu ono
 ophu ị ti paduru phẹ haa
 l'echiegu.

Urwukpu ono, kpuru
 oronmono ono ta
 ahajeduru phẹ l'eswe.

O due phẹ phọ shikota l'uzo,
 ẹphe shiru.

Ophu oku ono, kpuru
 oronmono ono
 ahajeduru phẹ l'enyashi.

Ọ nọdu abụjeru ìphóró,
egoshi phẹ ụzo, ẹphe eshi.

20 Ị nuru phẹ Unme ngu ono,
dụ ree ono g'ọ kpọ-zijeru
phẹ ụzo.

Ọphu i ti kwedu g'ẹphe ribuhu
Mana, shi ngu l'ẹka.

Teme ị nukwa phẹ phọ mini
g'ẹphe ngụa lẹ k'ẹgu mini,
agụ phẹ nụ.

21 Apha ụkporo labọ bẹ i heru
phẹ l'echiegu.

Ọphu ọ tọ dudu iphe,
ụko iya dujeru phẹ.

Uwe phẹ ta akahụjeduru
akahụ.

Ọphu ọkpa ta abyajeduru
phẹ ẹrwa.

22 “I meru; ẹphe lwuta alị-eze;
mẹ ọha, dụ iche iche;
bya eworu alị ndu ono keshiaru
phẹ g'ọ bụru oke alị phẹ.

Ẹphe nataru alị Heshibonu,
bụ alị-eze Sihonu;
mẹ alị Beshanu, bụ alị-eze
Ogu.

23 I meru g'oshilokpa phẹ
ha igwerigwe gẹ kpokpode,
nọ l'igwe.

I dua phẹ dubata l'alị ono,
ị sụru nna phẹ g'ẹphe bahu
je anata ono.

24 Ọ bụru ụnwu phẹ bahu

je anata ali ono.
 I lwu-kpeeru phe ndu bu l'ali
 ono, bu iya bu ndu
 Kénanu.
 I meru ge ndu Kénanu;
 me ndu eze phe; me ndu ali
 ono l'ophu lakota phe l'eka;
 k'ophu epe e-me phe
 g'o du phe.

25 Epe lwutakota mkpukpu
 le mkpukpu, a kpushigbaaru
 ike; me ali, emehuje iphe;
 natakota ulo, ivu, dugbaa ree,
 du iche iche jiru ejiji.
 Epe natakwapo welu,
 a tuwaru atutu; me
 opfu-vayinu; me k'olivu;
 me oshi-omi, du iche iche.
 Epe ria epho ji phe; dachaa
 okporokpo.
 Eguru iphe ono, i nukotaru
 phe ono; be epe riru o tsoo
 phe utso.

26 Obenu l'epe te ekwedu mee
 iphe, i suru g'epe mee;
 teme epe kwefuru ngu ike;
 woru ekemu ngu nwucha
 l'azu.
 Epe gbushiru ndu mpfuchiru
 ngu, bu ndu loru phe eka
 le nchi g'ee-shi g'epe gha
 iphu l'eka i no.
 Epe pfubyishia epha ngu

njọ epfubyishi.

27 Ọ bụru iya meru g'o gude
i woru phẹ ye l'ẹka ndu
ọhogu phẹ, bụ ndu
mekpaaharu phẹ ẹhu.

Teke ẹphe nọ l'iphe-ẹhuka
ono bẹ ẹphe rakuru ngu.

Ị gbẹ l'imigwe ngaberu phẹ
nchị; bya egude
obu-imemini ngu, parụ ẹka
nụ phẹ ndu nafutaru phẹ l'ẹka
ndu ọhogu phẹ.

28 Nchị bya adule phẹ phọ doo;
ẹphe mee ejo-iphe l'iphu ngu
ọzo.

I wokwaru phẹ ye l'ẹka ndu
ọhogu phẹ ọzo; ẹphe bụru
ishi phẹ.

Ẹphe byakwa araku ngu ọzo;
ị gbẹ l'imigwe ngaberu phẹ
nchị.

Ị phụahaaru phẹ obu-imemini;
nafuta phẹ ugbo olemole.

29 Ị loru phẹ ẹka lẹ nchị
g'ee-shi g'ẹphe lapfu
azụ meahaa ekemu ngu.

Ọle ẹphe wataleru-a eku
onwophẹ jịka eme iphe,
ị sụru g'e meje.

Ẹphe mee iphe-ẹji gude mebyia
omelalị ngu;
mbụ omelalị ngu ono,
bụ nemadzụ -dobe iya;

l'ọ nọdu ndzụ ono.
 Ẹphe gude l'ẹphe bu
 ekwegekwe gbakutaru
 ngu azụ;
 tẹme ẹphe kwefu ike jịka
 angaberu ngu nchị.

30 Apha, dụ igwerigwe bẹ ị
 takọtaru phẹ nshi.

Tẹme i gude Unme ngu lọ
 phẹ ẹka lẹ nchị shita l'ọnu
 ndu mpfuchiru ngu.

Ọle ẹphe ta angaduru iya
 nchị.

Ọ buru iya meru g'o gude i
 woru phẹ ye l'ẹka ndu alị ọzo,
 bukube phẹ nụ.

31 Obenu l'i gude k'obu-imemini
 ngu ono, parụ ẹka;
 ọphu i ti kwedu g'ẹphe chihu;
 ọphu i kwedu haa phẹ;
 kele ị bụ Chileke ọphu emeje
 eze-iphe-oma; bya aburu onye
 aphuje obu-imemini.

32 Ọo ya bụ; gube Chileke anyi;
 mbụ gube Chileke, parụ ẹka;
 buru Okalibe;
 bya aburu onye dụ ebvu;
 mbụ gube onye ono,
 edobeje ọgbandzu ngu;
 ọphu n-yemobu ngu abvudu
 abvubvu;
 jiko g'iphe-ẹhuka-a,
 anyi ejegbabe-a ta adukwa

ngu mkp̄ee mkp̄ee l'anya;
 bụ iya bụ iphe-ehuka, dapfutaru
 anyi l̄e ndu eze anyi-a;
 m̄e ndu-ishi anyi;
 m̄e ndu-uke Chileke anyi;
 m̄e ndu mpfuchiru Chileke anyi;
 mbụ iphe-ehuka ono,
 dapfutaru nna anyi ph̄e;
 m̄e ndibe ngu l'ophu;
 e -shi l̄e teke ndu eze ndu
 Asiriya bụ ishi byasụ
 ntanụ-a.

³³ Iphemiphe ono,
 dapfutakotaru anyi ono b̄e
 iswi dukotakwa ngu mma.
 I meru iphe, pfuru nhamunha;
 obenu l'anyịbedua meru
 ejo-iphe.

³⁴ Noo k̄ele ndu eze anyi ph̄e;
 m̄e ndu-ishi anyi;
 m̄e ndu-uke Chileke anyi;
 m̄e nna anyi ph̄e te
 emeduru ekemu ngu.

Ophu eph̄e ta ngaduru nch̄i
 l'iphe, ị s̄uru g'e mee;
 m̄e l'eka ị l̄oru ph̄e l̄e nch̄i;
³⁵ je akpaa l̄e teke eph̄e n̄o
 l'al̄i-eze ph̄e l'eka eph̄e eri
 eguru iphe, parụ eka ị
 n̄ukotaru ph̄e; bya an̄odu
 l'al̄i ono, ha ọsa ono; mbụ al̄i,
 emehuje iphe,
 bụ eka ị n̄uru ph̄e ono;

bẹ ẹphe te ejeduru ngu ozi;
 ọphu ẹphe adakọbeduru haa
 ẹjo-ememe, ẹphe eme.

³⁶ Lewarọ g'anyi bụ ohu nta-a
 l'alị ono, ị nuru nna anyi oche
 phẹ ono; mbụ g'ẹphe ria iphe,
 shi iya futa; mẹ iphe-oma,
 du iya nụ ono.

Lewarọ g'anyi bụ ohu.

³⁷ Ọ bụru ndu eze ono, i doberu
 g'ẹphe bụru ndu-ishi anyi-a bẹ
 iphe, shi l'alị ono a-alakọtaje
 l'ẹka.

Iphe, kparụ iya nụ bụru iphe-ẹji,
 anyi meshiru.

Ẹphe gude anyịbedua;
 mẹ ẹku anyi eme iphe,
 du phẹ ree.

Anyi nọkwa l'oke iphe-ẹhuka!"

Ndu byaru ẹka l'ẹkwo ọgbandzu

³⁸ "Ọ kwa iphe ono meru g'o gude anyi nọdu
 agba ọgbandzu-a, geru egeru-a; bya edekwa iya
 phọ edede l'ẹkwo gẹ ndu-ishi anyi; mẹ ndu Lívayi
 anyi; mẹ ndu-uke Chileke anyi mee ya iphe-
 ọhubama."

10

¹ Ndu meru iphe-ọhubama l'ẹkwo ọgbandzu
 ono bụ: ọchi-ọha, bụ Nehemaya nwa Hakalaya;
 mẹ Zedekaya; ² mẹ Seraya; mẹ Azariya; mẹ Jiere-
 maya; ³ mẹ Pashọ; mẹ Amaraya; mẹ Malukayijia;
⁴ mẹ Hatushi; mẹ Shebanaya; mẹ Maluku; ⁵ mẹ

Harimu; mę Meremotu; mę Obedaya; ⁶ mę Danęlu; mę Ginetonu; mę Baruku; ⁷ mę Meshulam; mę Abáyijia; mę Mijiaminu; ⁸ mę Mazaya; mę Biligayi; mę Shemaya. Ndu ono bukota ndu-uke Chileke.

⁹ Ndu kę Lívayi bu: Jieshuwa nwa Azanaya; mę Binuyi, bu onye shi l'eri Henadadu; mę Kadumelu; ¹⁰ mę unwunna phe, bu Shebanaya; mę Hodaya; mę Kelita; mę Pelaya; mę Hananu; ¹¹ mę Mayika; mę Rehobu; mę Hashabaya; ¹² mę Zaku; mę Sherebaya; mę Shebanaya; ¹³ mę Hodaya; mę Bani; mę Beninu.

¹⁴ Ndu-ishi ndu Ízurelu, mekwarupho iphe-ohubama l'ekwo oğbandzu ono bu: Paroshi; mę Pahatu-Mówabu; mę Elamu; mę Zatu; mę Bani; ¹⁵ mę Buni; mę Azugadu; mę Bebayi; ¹⁶ mę Adonijia; mę Biguvayi; mę Adinu; ¹⁷ mę Ateya; mę Hezekaya; mę Azuru; ¹⁸ mę Hodaya; mę Hashumu; mę Bezayi; ¹⁹ mę Harifu; mę Anatotu; mę Nebayi; ²⁰ mę Magupiyashi; mę Meshulamu; mę Heziru; ²¹ mę Meshezabęlu; mę Zadoku; mę Jiaduwa; ²² mę Pelataya; mę Hananu; mę Anaya; ²³ mę Hosiya; mę Hananaya; mę Hashubu; ²⁴ mę Haloheshi; mę Piliha; mę Shobęku; ²⁵ mę Rehumu; mę Hashabuna; mę Maseya; ²⁶ mę Ahaya; mę Hananu; mę Ananu; ²⁷ mę Maluku; mę Harimu; mę Bana.

Oğbandzu, a gbaru

²⁸ Ndu Ízurelu ozo, phoduru nu; mę ndu-uke Chileke; mę ndu Lívayi; mę ndu nche-onu-oguzo; mę ndu aguje ebvu; mę ndu eje ozi l'eze-ulo Chileke; mę iphe, bu ndu gude k'ekemu

Chileke ono bufu onwophe l'ehu ndu ohozo; mewaro unyomu phe; me unwu phe unwoke; me unwada phe, bu ndu ophu iphe edowa enya; ²⁹ tuko g'ephe ha tsoru unwunna phe; me ndu a maru epha phe kpuru enwa kpua onwophe; ria nte l'ephe a-nodu eme ekemu Chileke; mbu ekemu ono, Chileke shi l'eka Mosisu, bu nwozi iya tya; teme l'ephe a-nodu eme iphe, Chipfu, bu Nnajiuphu suru g'e meje; meje omelali iya; me iphe, o toru okpa iya.

³⁰ “Anyi nodu ekwe ukwe l'anyi tee kuduru unwada anyi kee ndu ali ozo; ophu anyi ta alutaduru unwu anyi unwoke unwada nkephe.

³¹ “O -buru le ndu ali ozo be wobataru ngwaswa phe; me ereshi phe bya erere l'eswe atuta unme be anyi ta azudu phe aswa l'eswe-atuta-unme; ozoo mboku ozo, du nsu. Apha k'esa be anyi taa kodu ali akoko; teme iphe, bu ugwo, e ji anyi ejiji be anyi a-hakotaje g'o laa ke mmanu.

³² “Iphe ozo, anyi kwetaru l'anyi a-nodu eme bu l'aphagapha be anyi e-wotaje mkpola-ochaa, erwa iya du nkereto shekelu bya anu g'e gude eje ozi, du l'ulo Chileke anyi. ³³ Mbu g'e gudeje iya zuta iphe, e gude eme buredi, eedobejeru Chileke nsu; gude iya zuta iphe, e gude egwe ngwejanri, eegweje tekenteke; me iphe, e gude egwe ngweja-akpo-oku, eegweje tekenteke; me iphe, e gude egwe ngweja, eegweje l'eswe-atuta-unme; me ophu eegweje l'obo onwa ophuu; me l'obo iphe ozo, bu obo iphe, geru egeru; me ngweja ozo, du nsu; me ke ngweja iphe-eji, e gude apfu ugwo iphe-eji, ndu Izurelu meshiru; mewaro

iphe, bukpo ozi, eeje ejeje l'ulo Chileke anyi.

34 “Anyibe ndu-uke Chileke; me ndu Lívayi; me ndu Ízurelu mmanu be tuakwaru ido gude gbaa g'ee-shije akpa nku, e wobata l'ulo Chileke anyi aphasapha. A gbaru akpa nku obu l'anya-unuphu l'anya-unuphu; tubukwaapho teke aakpataje iya; mbu nku, e gude akpo ngweja oku l'oru-ngweja Chipfu, bu Chileke anyi; egube ono, e deru iya l'ekemu ono.

35 “Akpuru-iphe-mbu, shi l'iphe, anyi meberu l'ali; yele akpuru mbu oshi-omi anyi mitaru be anyi e-wobataje l'ulo Chipfu aphasapha.

36 “Nokwapho g'anyi e-kutaje okpara l'unwoke, a nwuru anyi; kputa anu, bu ivuzo l'eswi anyi; me aturu anyi; me egbu anyi; gude je l'ulo Chileke anyi; je anu ndu-uke Chileke, bu ndu eje ozi l'ulo Chileke anyi ono; egube ono, e deru iya l'ekemu ono.

37 “Anyi e-wotakwapho ereshi mbu anyi, e gweru egwegwe; yele iphe ozo, gbaru g'anyi nu Chileke; du g'akpuru mbu, oshi-omi anyi mitaru; yele me ophu anyi; me manu; je anu ndu-uke Chileke g'e dobegbaa l'ulo, aakwakobeje iphe l'ulo Chileke. Anyi e-wota oke-lanu-l'uzo-iri l'iphe, anyi metaru l'ali nu ndu Lívayi; noo kele o ndu Lívayi be anakoje oke-lanu-l'uzo-iri le mkpukpu le mkpukpu aka akobeje iphe.

38 Onye uke Chileke, bu onye shi l'eri Eronu be a-noduje swiru ndu Lívayi ono m'ephe nakoje oke-lanu-l'uzo-iri ono. Ndu Lívayi ono e-shi l'ime oke-lanu-l'uzo-iri ono, ephe nakoru ono wofuta oke-lanu-l'uzo-iri je edobe l'ulo, aakwakobeje

iphe l'ulo-eku, du l'ulo Chileke anyi. ³⁹ Ndu Ízurelu me ndu Lívayi be a-tuje ereshi; me meo ophuú; me manu wobata l'ulo, aakwakobeje iphe, bu eka ivu k'eze-ulo Chileke aduje; me l'eka ndu-uke Chileke, l'eje ozi teke ono anoduje; me eka ndu nche-onu-oguzo; me ndu aguje ebvu anoduje; mbu l'anyi taa haedu ulo Chileke anyi."

11

Ndu byaru eburu le Jierúsalemu

¹ Teke ono bu ndu-ishi ndu Ízurelu bu le Jierúsalemu. Ndu Ízurelu ophuna bya atua ido gude hota ndu e-je eburu le Jierúsalemu, bu mkpukpu, du nso ono. O buru onye lanu be ephe ahotaje l'ime umadzu iri; ephe ahaa tete ophuu g'ephe buru le mkpukpu phe. ² Ndu kweru wofuta onwophe l'ephe e-buru le Jierúsalemu be ndu Ízurelu jaru ajaja. ³ Ndu owa-a bu ndu ophu bu ndu-ishi mkpukpu le ndu ophu bu le Jierúsalemu; obenu le ndu ophuu, bu iya bu ndu Ízurelu; me ndu-uke Chileke; me ndu Lívayi; me ndu eje ozi l'eze-ulo Chileke; me oshilokpa ndu ejeru Sólomonu ozi be onyenonu l'ehu l'ehu bukota l'alí k'eka iya le mkpukpu phe l'alí Jiuda. ⁴ Oshilokpa Jiuda me oshilokpa Benjiaminu be haru buru le Jierúsalemu.

Ndu ophu bu oshilokpa Jiuda, bu le Jierúsalemu bu: Ataya; Ataya bu nwa Uzaya; Uzaya buru nwa Zekaraya; Zekaraya buru nwa Amaraya; Amaraya buru nwa Shefatiya; Shefataya buru nwa Mahalalelu, bu onye shi l'eri Pérezu.

⁵ Teme waa Maseya; Maseya bu nwa Baruku; Baruku buru nwa Kolu-Hoze; Kolu-Hoze buru nwa Hazaya; Hazaya buru nwa Adaya; Adaya buru nwa Jioyaribu; Jioyaribu buru nwa Zekaraya, bu onye shi l'eri Shilo.

⁶ Oshiloqpa Perezu, bu le Jierusalemu be tukoru du unu l'ukporo eto l'umadzu esato; bukotaru mkparawa.

⁷ Ndu bu oshiloqpa Benjiaminu, bu le Jierusalemu bu: Salu; Salu bu nwa Meshulamu; Meshulamu buru nwa Jiowedu; Jiowedu buru nwa Pedaya; Pedaya buru nwa Kolaya; Kolaya buru nwa Maseya; Maseya buru nwa Itiyelu; Itiyelu buru nwa Jieshaya.

⁸ A bya eyeru iya unwunna Salu phe, bu Gabayi; me Salayi.

Iphe, ephe tukoru du bu unu labo l'ukporo ishii l'umadzu esato. ⁹ Onye bu onye-ishi phe bu Jiowelu; nwa Zikiri; Jiuda, bu nwa Hasenuwa buru onye etsota onye-ishi le mkpukpu ono.

¹⁰ Ndu uke Chileke, bu le Jierusalemu ono bu: Jiedaya nwa Jioyaribu; me Jiakinu; ¹¹ me Seraya nwa Hilikiya; Hilikaya buru nwa Meshulamu; Meshulamu buru nwa Zadoku; Zadoku buru nwa Merayotu; Merayotu buru nwa Ahitubu, bu onye-ishi l'ulo Chileke. ¹² A bya eyeru iya unwunna phe, bu ndu eje ozi l'eze-ulo Chileke. Iphe, ephe tukoru du bu unu labo l'ukporo umadzu l'umadzu labo.

Onye ozo bu Adaya nwa Jierohamu; Jiehoramu buru nwa Pelalaya; Pelalaya buru nwa Amuzi; Amuzi buru nwa Zekaraya; Zekaraya buru nwa Pasho; Pasho buru nwa Malukayijia. ¹³ A bya

eyeru iya unwunna iya, bukota ndu-ishi l'enyaa-unuphu ibe nna phe. Iphe, ephe tukoru du buru ukporo iri l'ebo l'umadzu labo.

Onye ozo bu Amashayi nwa Azarelu; Azarelu buru nwa Ahuzayi; Ahuzayi buru nwa Meshilemotu; Meshilemotu buru nwa Ima. ¹⁴ A bya eyeru iya unwunna iya ndu bukota mkparawa. Iphe, ephe tukoru du bu ukporo ishii l'umadzu esato. Onye-ishi phe bu Zabudelu nwa Hagedolimu.

¹⁵ Ndu Lívayi, bu le Jierúsalemu bu: Shemaya nwa Hashubu; Hashubu buru nwa Azurikamu; Azurikamu buru nwa Hashabaya; Hashabaya buru nwa Buni.

¹⁶ Ndu ozo bu: Shabetayi yele Jiozabadu, bu ndu-ishi ndu Lívayi mbu ndu eleta enya l'ozi, eeje l'azu ulo Chileke.

¹⁷ Onye ozo bu: Matanaya nwa Mayika; Mayika buru nwa Zabudi; Zabudi buru nwa Asafu, bu onye-ishi ebvu-ekele; me epfu anu Chileke.

Bakubukaya bu onye k'ebo l'unwunna Matanaya.

Onye ozo bu Abuda nwa Shamuwa; Shamuwa buru nwa Galalu; Galalu buru nwa Jiedutunu.

¹⁸ Ndu Lívayi, bu le mkpukpu ono, du nsọ ono be tukoru du ukporo iri l'eno l'umadzu eno.

¹⁹ Ndu nche-onu-oguzo, bu le Jierúsalemu bu: Akubu; me Talumonu; me unwunna phe, bu ndu anoduje eche nche l'onu-oguzo. Iphe, ephe du bu ukporo esato l'umadzu iri l'ebo.

²⁰ Ndu Ízurelu ozo, phoduru nu; me ndu-uke Chileke; me ndu Lívayi ozo, bu ndu phoduru nu

bẹ bukọta lẹ mkpukpu lẹ mkpukpu, nọgbaa l'ali Jiuda. Onyenonu bugbaa l'oke ali nkiya. ²¹ Ndu eje ozi l'eze-ulo Chileke buru l'eli úbvú Ofelu. O buru Ziha yele Gishipa bu ndu-ishi ndu ono, eje ozi l'eze-ulo ono.

²² Ndu bu ndu-ishi ndu Lívayi ono, bu lẹ Jierúsalemu bu: Uzi nwa Bani; Bani bu nwa Hashabaya; Hashabaya buru nwa Matanaya; Matanaya buru nwa Mayika, bu onye shi l'eri Asafu. Eri Asafu bẹ bu ndu-ishi ebvu, aagu agugu l'eze-ulo Chileke. ²³ Epehe ndu aguje ebvu ono bẹ eze turu ekemu swiberu; o buru iya anoduje egoshi iphe, epehe a-nodu eme mbokumboku.

²⁴ Onye nọ-chiru enya ndu Ízurelu l'iphu eze bẹ bu Petahaya nwa Meshezabelu; mbu onye shi l'eri Zera nwa Jiuda.

Ndu Ízurelu, bu lẹ mkpukpu, ta abudu Jierúsalemu

²⁵ A bya l'unwu mkpukpu ozo me egu, du iya nu; unwu Jiuda bẹ haru buru lẹ Kiriyatu-Araba; me unwu mkpukpu, dukota iya nu. Epehe hakwarupho buru lẹ Dibonu me unwu mkpukpu, dukota iya nu; me Jiekabuzelu me unwu mkpukpu, dukota iya nu. ²⁶ Epehe buru lẹ Jieshuwa; me Molada; me Betu-Peletu; ²⁷ me Haza-Shuwalu; me Biye-Sheba; yele unwu mkpukpu, dukota iya nu; ²⁸ me lẹ Zikulagu; me Mekona; yele unwu mkpukpu, dukota iya nu; ²⁹ me lẹ Enu-Rimonu; me Zora; me Jiarumutu; ³⁰ me Zanowa; me Adulamu; yele unwu mkpukpu, dukota iya nu; me lẹ Lakishi; yele

egu, nokota iya nu; me le Azeka ye le unwu mkpukpu, dukota iya nu. Oo ya bu l'ephe bu e -shi le Biye-Sheba jeye le nsuda Hinomu.

³¹ Oshilokpa Benjaminu be shi le Geba bua kwaseru; ephe bu le Mikumashi; me Ayijia; me Betelu; ye le unwu mkpukpu, dukota iya nu; ³² me le Anatotu; me Nobu; me Ananaya; ³³ me Hazo; me Rama; me Gitayimu; ³⁴ me Hadidi; me Zebowimu; me Nebalatu; ³⁵ me Lodu; me Ono; ye le nsuda "Nsuda ndu eme ona." ³⁶ Ndu Lívayi, bu ndu ephe l'ipfu Jiuda shi buru be a haru keru yeru ipfu Benjaminu.

12

Ndu uke Chileke waa ndu Lívayi

¹ Waa ndu-uke Chileke; me ndu Lívayi, ephe le Zerúbabelu nwa Sheyalutiyelu; me Jieshuwa swi shi l'eka a kpuru phe le ndzu lwa baa: Seraya; me Jieremaya; me Ezura; ² me Amaraya; me Maluku; me Hatushi; ³ me Shekanaya; me Rehumu; me Meremotu; ⁴ me Ido; me Ginetoyi; me Abáyijia; ⁵ me Mijiaminu; me Madaya; me Biliga; ⁶ me Shemaya; me Jioyaribu; me Jiedaya; ⁷ me Salu; me Amoku; me Hilikaya; me Jiedaya. Ndu ono shi bukotaru ndu-ishi ndu-uke Chileke; buru ishi unwunna phe teke Jieshuwa bu ishi.

⁸ Ndu ke Lívayi bu: Jieshuwa; me Binuyi; me Kadumelu; me Sherebaya; me Jiuda; me Matanaya. O buru Matanaya ye le unwunna iya be bu ndu k'ebvu-ekele du l'eka.

⁹ Unwunna phe, bu Bakubukaya; ye le Uni buru ndu anoduje ekweru phe ebvu ono.

Eri Jieshuwa, bu onye-ishi ndu-uke Chileke

¹⁰ Jieshuwa bu nna Jioyakimu; Jioyakimu buru nna Eliyashibu; Eliyashibu buru nna Jioyada;
¹¹ Jioyada buru nna Jionatanu; Jionatanu buru nna Jiaduwa.

Ndu-ishi l'anya-unuphu ndu-uke Chileke

¹² Ndu shi buru ishi l'anya-unuphu ndu-uke Chileke le teke Jioyakimu bu ishi bu:
 Onye-ishi ke anya-unuphu Seraya bu Meraya.
 Onye-ishi ke anya-unuphu Jieremaya buru Hananaya.
¹³ Onye-ishi ke anya-unuphu Ezura buru Meshulam.
 Onye-ishi ke anya-unuphu Amaraya buru Jiehananu.
¹⁴ Onye-ishi ke anya-unuphu Maluki buru Jionatanu.
 Onye-ishi ke anya-unuphu Shebanaya buru Jiوسف.
¹⁵ Onye-ishi ke anya-unuphu Harimu buru Aduna.
 Onye-ishi ke anya-unuphu Merayotu buru Helukayi.
¹⁶ Onye-ishi ke anya-unuphu Ido buru Zekaraya.
 Onye-ishi ke anya-unuphu Ginetonu buru Meshlamu.
¹⁷ Onye-ishi ke anya-unuphu Abayijia buru Zikiri.
 Onye-ishi ke anya-unuphu Minyaminu yele ke Mowadaya buru Pilitayi.
¹⁸ Onye-ishi ke anya-unuphu Biliga buru Shamuwa.

Onye-ishi ke ɛnya-unuphu Shemaya buru Jiehonatanu.

19 Onye-ishi ke ɛnya-unuphu Jioyaribu buru Matenayi.

Onye-ishi ke ɛnya-unuphu Jiedaya buru Uzi.

20 Onye-ishi ke ɛnya-unuphu Salayi buru Kalayi. Onye-ishi ke ɛnya-unuphu Amoku buru Eba.

21 Onye-ishi ke ɛnya-unuphu Hilikaya buru Hashabaya.

Onye-ishi ke ɛnya-unuphu Jiedaya buru Netanelu.

Edeshi epha ndu-uke Chileke waa ke ndu Lívayi l'ekwo

22 Teke Elijashibu bu ishi; me Jiyada; me Jiohananu; me Jiaduwa be e dekotaru epha ndu-ishi ndu Lívayi; me ke ndu-ishi ndu-uke Chileke l'ekwo; epha ono be e deru teke Dariyosu bu eze ndu Peshiya.

23 Unwu Lívayi, bu ndu-ishi l'ɛnya-unuphu ibe nna phe be e dekotaru epha phe l'ekwo, e deshuru iphe, e meru teke ono. Epha ono be e deru jeye teke ke Jiohananu, bu nwa Elijashibu.

Ekeshi ozi eze-ulo Chileke

24 Ndu-ishi ndu Lívayi bu: Hashabaya me Sherebaya; me Jieshuwa, bu nwa Kadumelu. Unwunna phe be apfujeru ghaaru phe iphu; agu ebvu-ajaja yele ebvu-ekele. Teke ndu ophuu guru iya; ndu ophuu ekwee ya ekwekwe egube ono, Dévidi, bu onye ke Chileke toru phe okpa iya.

25 Matanaya; me Bakubukaya; me Obedaya; me Meshulamu; me Talumonu; me Akubu be bu

ndu nche, anọduje eche nche l'ulo, eedobeje iphe l'onu-abata eze-ulo Chileke.

²⁶ Ndu ono be jeru ozi le teke ke Jioyakimu nwa Jieshuwa; mbu nwanwa Jiozadaku; me teke ke Nehemaya, bu ochi-oha; mekwapho teke ke Ezura, bu onye uke Chileke bya aburu onye edeje ekwo.

Eye igbulo Jierusalemu l'eka Chileke

²⁷ O be teke ee-woru igbulo Jierusalemu ono ye l'eka Chileke; a choo ndu Liviayi jekota l'ekameka, ephe bu; gephe byakota Jierusalemu bya egude ehu-utso; me ebvu-ekele; kua ogena; kpo une; me ogelenda; gude woru igbulo ono ye l'eka Chileke. ²⁸ Ndu Liviayi, bu ndu ogbo-ebvu ono shi l'iphe, bu ali, no-pheru Jierusalemu mgburugburu; me unwu mkpukpu, du le Netofa tuko dzukobe. ²⁹ Ndu ophu shi le Betu-Giligalu; me l'uzo Geba; me Azumavetu dzukotaru; kele ndu ogbo-ebvu ono be metaru mkpukpu buphee Jierusalemu mgburugburu. ³⁰ Ndu uke Chileke me ndu Liviayi doo onwophe nsọ; bya edokwaapho ndu Izurelu nsọ; bya edoo onu-abata Jierusalemu yele igbulo ono nsọ.

³¹ Teke ono be mu byaru eduta ndu-ishi ndu Jiuda; ephe nyihu eli igbulo ono. Mu bya agbaa uzi ndu ebvu labo, hagbaa shi, bu ndu a-nodu agu ebvu-ekele.

Uzi lanu wuru shia eli igbulo ono uzo ekutara futu le Onu-abata Ikpuzu. ³² Ndu l'etso phe l'azu bu Hoshaya yele nkeru-ebo ndu-ishi ndu Jiuda; ³³ me Azariya; me Ezura; me Meshulamu; ³⁴ me Jiuda; me Benjaminu; me Shemaya; me

Jieremaya; ³⁵ mę ndu ọzo, shi l'eri ndu-uke Chileke, chigbaa opu; mękwapho Zekaraya, bu nwa Jionatanu; Jionatanu bu nwa Shemaya; Shemaya buru nwa Matanaya; Matanaya buru nwa Mayikaya; Mayikaya buru nwa Zaku; Zaku buru nwa Asafu; ³⁶ yęe unwunna iya, bu Shemaya; mę Azarelu; mę Milalayi; mę Gilalayi; mę Mayi; mę Netanelu; mę Jiuda; mę Hanani. Ephembedua be gude ududu ngwa-ebvu, Devidi, bu onye ke Chileke suru g'e gudeje. O buru Ezura, bu onye edeje ekwo be vutaru phe uzo. ³⁷ Epherwuepho Onu-abata Enya-nwobvu; epherwuepho je enyikota eka eeshije enyiba le mkpukpu Devidi; mbu me a -nodu enyikota igbulu ono enyikota. Epherwuepho eli igbulu ulo Devidi ono futa le Onu-Abata-Mini, no l'uzo enyanwu-awawa.

³⁸ Ndu ebvu ophunapho wuru shia uzo ekicha. Mbedua me nkeru-ebo ndu Izurelu nodu etso phe l'azu l'eli igbulu ono. Anyi shi l'ulo-ephekerephe Otapfupfupfu-oku futa le Igbulo-osa. ³⁹ Anyi shi l'eka ono wuru je aghaa Onu-abata Ifuremu; me Akahu Onu-abata; me Onu-abata Ema; me Ulo-ephekerephe Hananelu; me Ulo-ephekerephe, aza Ukporo-ise; shi nno futa le Onu-abata Aturu. O buru l'onu-abata Nche be epherwuepho.

⁴⁰ Ndu ogbo-ebvu labo ono, aguje ebvukele ono bya anodu l'onodu phe l'ulo Chileke. Mbedua me nkeru-ebo ndu-ishi ono nodukwapho l'onodu k'anyi. ⁴¹ Ndu uke Chileke, bu Eliyakimu; me Maseya; me Minyaminu; me Mayikaya; me Eliyowenayi; me Zekaraya; me

Hananaya nõdu l'õnodu nkephe pagbaarũ opu l'eka. ⁴² Ndu ozo bu Maseya; me Shemaya; me Eleyaza; me Uzi; me Jiehohananu; me Malukayijia; me Elamu; me Eza. Ndu ebvu ono wata agu ebvu; onye bu ishi ebvu phe buru Jiezurahaya.

⁴³ Mbõku ono be ephe gweru ngweja, paru eka apaa; ehũ tsõõ phe utso; noo kele Chileke be meru g'ehũ tsõõ phe utso shii. Unwanyi me unwegirima tũko ete eswa. A -gbe l'eka du enya anũ uzu ehũ-utso, aatũ le Jierusalemũ.

Iphe, a nũru g'e gude baarũ Chileke eja l'ũlo iya

⁴⁴ O buru mbõku ono be a hotaru ndu a-nõdu eletaje enya l'ũlo, eedobeje iphe, a turu atutu; me akpũru-iphe-mbu; me oke-lanu-l'ũzo-iri. Ndu ono e-shije l'opfũ, a kõtõtaru le mkpũkpũ ono mgburugburu wobata iphe bya edobe l'ũlo ono, eedobeje iphe ono egube ekemu suru g'e mejeru iya ndu-uke Chileke me ndu Lĩvayi. Kele ndu-uke Chileke; me ndu Lĩvayi ono, eje ozi ono meru; ehũ nõdu atso ndu Jiuda utso. ⁴⁵ Ephe eje ozi Chileke phe; bya eje ozi k'asafũ ntũrwũ; egube ono, ndu ebvu me ndu nche-õnu-õguzõ ejekwaphõ ozi, rwuberu phe nũ; egube ono, Dẽvidi me nwa iya, bu Sõlomõnu suru g'e meje iya. ⁴⁶ Noo kele teke Dẽvidi me Asafũ nõ ndzũ; mbũ teke ndiche be e shi nweru ndu-ishĩ ndu ebvu; nweru ebvu, e gude aja Chileke ajaja; me ebvu, e gude ekele iya ekele. ⁴⁷ Teke Zerũbabelu ye Nehemaya bu ishi be ndu Ízurelu g'ephe ha ewõtaje iphe,

rwuberu ndu ebvu mę ndu nche-ọnu-ọguzo nụ pphę mbọku-mbọku. Nokwaphọ g'ęphe edobeje iphe nsọ nụ ndu Lívayi; ndu Lívayi edobe iphe nsọ nụ oshilọkpa Eronu.

13

Ebufu ndu ọhozo l'ęka ndu Ízurelu nọ

¹ Mbọku ono bę ęphe guru iphe, e deru l'ękwo Mósisu; ndu Ízurelu numa-dzuru iya. Iphe, a guvuru l'ękwo ono bu g'ọ tọ dukwa onye Amonu; ọzoo l'ọo onye Mówabu e-je abata l'ęka ndibe Chileke dzukoberu; ² noo kele ęphe te gudedu nri mę mini gba ndu Ízurelu ndzuta; ọ buchiaru Belamu bę ęphe butaru g'ọ bya bya atua pphę ọnu. Ọ tọ bu lę Chileke anyi gharu ọnu ono ighaphu; ọ buru ọnu-ọma. ³ Ọo ya bu; ndu Ízurelu numaepho iphe, ekemu ono pfuru; ęphe bufukọta ndu shi l'ọhozo l'ęka ndu Ízurelu nọ.

Nehemaya edozi iphe

⁴ Tęmanu iphe ono mee bę Elyashibu, bu onye uke Chileke; mbu onye a turu ęka g'ọ buru onye-ishi ęka eedobeje iphe l'eze-ulo Chileke; bę yele Tobaya du lę ree shii. ⁵ Eze mkpuru ono, e shi edobeje ngweja-nri; mę unwù-isensu; mę ivu, e gude eje ozi l'eze-ulo Chileke; mę okelanu-l'uzo-iri k'ereshi; mę ke mee; mę ke manu, aasuje g'e wotaru ndu Lívayi; mę ndu ebvu; mę ndu nche-ọnu-ọguzo; mbu mkpuru ono, e shi edobeje iphe, a turu utu nụ ndu-uke Chileke bę Elyashibu nuru Tobaya. ⁶ Teke ono, iphe ono eme ono bę mu ta nọdu lę Jierúsalemu.

Noo kele apha, kwe Atakuzakuzesu ukporo apha l'apha iri l'ẹbo, e meru iya eze ndu Bábilonu bẹ mu laphuru azu l'ibe eze. A noepho nwanshi; mu rwo eze g'o haa mu ge mu lashia. ⁷ Mu bya alwarwuta Jierusalemu bya ahuma ejo-iphe ono, Eliyashibu meru l'opfu ehu Tobaya ono; mbu anunu ono, o nuru iya mkpuru, du l'eze-ulo Chileke o buru ono. ⁸ Iphe ono ghushikpo mu eghu ike; mu chitakota ivu ulo, bu ke Tobaya, no le mkpuru ono; tuphashia l'etezi. ⁹ Mu bya akaru; a bya emechaa mkpuru ono emecha; mu bya egwetakota ivu, eegudeje eje ozi l'ulo Chileke bya edobephu azu l'eka ono; me ngweja-nri; me unwu-isensu.

¹⁰ Mu bya amakwarupho l'a taa nujedu ndu Liviayi iphe, rwuberu phe nu; o mee k'opfu bu le ndu Liviayi; me ndu l'aguje ebvu, bu ndu l'eje ozi l'eze-ulo Chileke ono be gbakashihuru nu; onyenonu koohaa opfu iya. ¹¹ Oo ya bu mu baaru ndu-ishi mba su phe: “?Bu gunu meru g'o gude a paru eze-ulo Chileke gbado egube-a?” Mu bya achikobe ndu Liviayi; me ndu ono, aguje ebvu ono dobephu phe azu l'onodu phe. ¹² O buru teke ono be ndu Jiuda l'opfu wobataaharu oke-lanu-l'uzo-iri, shi l'ereshi; me mee; me manu l'ulo, eedobeje iphe. ¹³ Ndu mu turu eka g'ephe buru ndu-ishi ulo ono, eedobeje iphe ono bu: Shelemaya, bu onye uke Chileke; me Zadoku, bu onye edeje ekwo; me onye Liviayi, epha iya bu Pedaya. Onye mu hotaru swibe phe g'o yejeru phe eka bu Hananu nwa Zaku; buru nwanwa Matanaya; noo kele ndu ono be a guru le ndu e gude ire phe eka. Ozi

phẹ bụ g'ephe kejeru unwunna phẹ iphe.

¹⁴ “Gube Chileke mu; nyatakwa mu ọọ ya l'iphe-a, mu meru-a. Be huchafukwa iphe, dụ ree, mu megbaberu eze-ulo gube Chileke mu; me l'ozi, eeje l'eka ono.”

¹⁵ Teke ono be mu humaru ndu no le Jiuda azoshi me l'akpuru vayinu l'eswe-atuta-unme; gude nkapfu-igara evubatagbaa ereshi; me me; me akpuru vayinu; me akpuru figu; me ivu ozo, dụ iche iche. Ephe nodu evu iya ala le Jierusalemu l'eswe-atuta-unme. Mu loo phẹ eka le nchi g'ephe haa ere nri le mboku ono.

¹⁶ Ndu Taya, bu ndu bukwapho le Jierusalemu be evubataje ema; me ngwaswa ozo, dụ iche iche ere ndu Jiuda le Jierusalemu l'eswe-atuta-unme. ¹⁷ Oo ya bu; mu baaru ndu a maru epha phẹ le Jiuda mba su phẹ: “?Ejo-iphe owa, unu eme-a bu gunu; ke g'unu merwushi eswe-atuta-unme? ¹⁸ ?Tobudu egube iphe ono be nna unu phẹ meru; meru iphe, Chileke anyi meru g'ejo iphe-ehuka-a dapfuta anyi waa mkpukpu-a? Unu byakwa nta-a bya awata emerwushi eswe-atuta-unme; shi nno eme g'oke ehu-eghu Chileke kabaa azupyabe ndu Izurelu.”

¹⁹ O be l'uzo nchi-ejihu le mboku, bu nchitabohu iya a-buru eswe-atuta-unme; mu tua ekemu su g'a gbachishikota mgbo onu-abata Jierusalemu; sukwapfo g'a ta guhakwa iya aguha jeye eswe-atuta-unme a-bvada. Teme mu haru ndu-ozu mu dokachaa l'onu-abata ono g'o to dushi ivu, ee-vubata l'eswe-atuta-unme ono. ²⁰ Ndu ngho; me ndu ere ngwaswa, dụ iche

iche kwachaa akwakwa l'azụ Jierúsalemụ ugbo lanụ; ọzoo ugbo ẹbo. ²¹ Mu bya alọoru phẹ ẹka lẹ nchị sụ phẹ: “?Bụ ọnu meru g'o gude unu ọdu akwajẹ l'azụ igbulọ ono? Unu -mebaa ya ọzo bẹ mu a-dakwa unu ẹka.” Shita teke ono kwaseru bẹ ẹphe byabuhuru l'eswe-atuta-unme. ²² Mu sụ ndu Lívayi g'ẹphe sachaa onwophe asacha je anọdu cheje nche l'ọnu-abata ono; k'ọphu eedobe eswe-atuta-unme ono nsọ.

Nyatakwa mu phọ l'iphe-a, mu meru-a; ọgube Chileke mu. Guderọ n-yemobu ngu ono, parụ ẹka ono phọaru mu obu-imemini.

²³ Lẹ teke ono bẹ mu humakwarupho ndu Jiu, lụshiru unwanyi, shi lẹ Ashidodu; mẹ lẹ Amonu; mẹ lẹ Mówabu. ²⁴ Nkerẹbo l'unwegirima phẹ ọdu epfu opfu ndu Ashidodu; ọzoo opfu ndu ibiya nkepẹ; ọphu ẹphe ta amadụ g'epfu opfu-alì ndu Jiu. ²⁵ Mu bya abaarụ phẹ mba tuta phẹ ọnu. O nweru ndu ọphu mu chiru iphe; lashia phẹ ẹgbushi l'ishi. Mu sụ phẹ g'ẹphe gude ẹpha Chileke ria nte sụ: “Anyi ta abyadụ e-kuta unwada anyi kee unwu phẹ nwoke; ọphu anyi ta abyadụ alutaru unwu anyi unwoke unwada phẹ; ọphu anyi ta alutadu phẹ k'onwanyi. ²⁶ ?Tọ bunaa k'unwanyi, dụ nno bẹ Sólomonu, bụ eze ndu Ízurelu gude mee iphe-ẹji tọ? L'ọhamoha bẹ ta adukwa eze ọzo, dụ gẹ yẹbedua. Teme ọ buru onye Chileke iya yeru obu; Chileke mee ya g'ọ buru eze ndu Ízurelu l'ọphu. Obenu l'ọo unwanyi ọhozo bẹ kpataleru-a o mee iphe-ẹji. ²⁷ ?Ọ dụ ree g'anyi gude nchị anyi numa l'unu l'eme ẹjo-iphe, ha ẹgube-a; mbụ l'unu lụshiru

unwanyi ọhozo; shi nno buru ndu mesweru Chileke anyi ọtọ?”

²⁸ Onye lanụ l'unwu Jioyada; nwa Ẹliyashibu, bu onye-ishi ndu-uke Chileke be bu ọgo Sambalatu, bu onye Horonu. Ọo ya bu; mu chifu iya g'o shi l'eka mu no lufu.

²⁹ Nyatakwa phe; gube Chileke mu; noo kele ephe turwuaru okwa ndu-uke Chileke; bya aturwua ogbandzu, gu le ndu-uke Chileke me ndu Liviayi gbaru.

³⁰ Tobudu iya bu; mu safukota phe nturuwu, ephe chitaru l'ehu ndu ali ozo; bya anuchaa phe ozi, gbaru ndu-uke Chileke; me ndu Liviayi; onyenonu jeahaa ozi, gbaru iya nu. ³¹ Mu mekwapho g'e vutaje nku yele akpuru-ipe-mbu l'orwuberu iya.

Gube Chileke mu; nyatakwa mu ro le k'oma.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d